

TUTÚ DÍHNA NUU NĪ CADÚHA TÉ PĀBLÚ QUÍHĪⁿ NDAHA ÑÁYIU ÑUÚ CÒRINTÚ

Té Pāblú cādūha-dé tutú quíhĪⁿ ndaha ñáyiū
xĩndecu ichi Xítohó Jesucrístú ndécú ñuú Còrintú

1 Yúhú té Pāblú ní cáháⁿ ñáhá Yă Ndiöxí xii-í cuendá sá cāháⁿ-í tnúhu Xítohó Jesucrístú núú ñáyiū, chi ducaⁿ nĪ cachí Yă Ndiöxí cunduu. Te cādúha-í tutú-a ndihi té Sōstenés té ndècu ndihi-o ichi Xítohó Jesucrístú ²cuendá daquixi-í ndaha nchòhó ñáyiū xĩndecu ichi Yá Ndiöxí ndécú ñuú Còrintú, chi nchòhó cúú-ndó ñáyiū cùu cuendá Yă Ndiöxí cuendá sá ndécú ndihi-ndo Xítohó Jesucrístú. Te diu-ni-ndo cùu-ndo ñáyiū ní cáháⁿ ñáhá Yă Ndiöxí cuendá cundecu yĩñùhu-ndo núú-gă, ndihi nchaa dava-gă ñáyiū ndècu nchaa xichi, ñáyiū cāchí sá ĩo cāhnu cuu Xítohó Jesucrístú. Te Yaá-áⁿ cúú-gă Xítohó-yu, te diu-ni-gă cúú-gă Xítohó nchoo tùcu. ³Te xìcáⁿ táhù-í núú Tătá-ó Dütú Ndiöxí ndihi núú Xítohó Jesucrístú sá ndè nduú-gă ĩo na chĩndee chitúu ñaha-gă xii-ndo, te ĩo váha cuu iní-ndó cùndecu-ndo.

Yá Ndiöxí ĩo chĩndee ñaha-gă xii-o cuendá
sá ndécú-ó ndihi Xítohó Jesucrístú

⁴Te ducaⁿ-ni ĩo ndàcáⁿ táhù-í núú Yă Ndiöxí cuendá-ndó, chi mee-gă ĩo chĩndee chitúu ñaha-gă xii-ndo sã cuendá Xítohó Jesucrístú. ⁵Te cuendá sá ndécú-ndó ndihi Xítohó Jesucrístú, núú xiăⁿ Yă Ndiöxí ĩo chĩndee ñaha-gă xii-ndo sàá díquí-ndó nàcuáa cáháⁿ-ndó, ndihi nàcuáa cùtnuní iní-ndó, ⁶chi tnúhu sá ni nĪhí-ndó cuendá Xítohó Jesucrístú ní quée-xi iní-ndó. ⁷Te xiăⁿ nũu nchaa sá vāha ñá túú tnàhí cùmání xii-ndo chi Yá Ndiöxí ĩo chĩndee ñaha-gă. Te ducaⁿ quide-gă nini nchòhó ni yùhu ni iní-ndó ndètu-ndo sáa nduu quixi tucu Xítohó Jesucrístú. ⁸Te Yá Ndiöxí ducaⁿ-ni ĩo chĩndee ñaha-gă xii-ndo cuendá sá vă yōo teñaha cuēchi nduu na quixi tucu Xítohó Jesucrístú. ⁹Te nchaa sá cāháⁿ Yă Ndiöxí dacuití quide-gă, te diu-gă cúú-gă Yaá ní cáháⁿ ñáhá xii-ndo cuendá cuu ĩiⁿnuu-ndo ndihi Déhe-gă Xítohó Jesucrístú Yaá cúú Xítohó-ó.

Ñá túú cùu ìⁿnuu ñáyiú ndècu ichi Xítóhó Jesucrìstú

10Te nchòhó ñáyiú ndècu ndìhi-í ichi Xítóhó Jesucrìstú càháⁿ-í dóho-ndo sã vã ndì dííⁿ càni iní-ndó, te ío cuu ìⁿnuu-ndo cùndecu-ndo, te ìⁿ-ni càni iní-ndó, te ìⁿ-ni càda-ndo chi ducaⁿ cuìní-gá cunduu. **11**Te duha càháⁿ-í dóho nchòhó ñáyiú ndècu ndìhi-í ichi Xítóhó Jesucrìstú, chi cue ñáyiú vehe té Clòé ní cachí tnúhu-yu xii-í sã ñà túú cùu ìⁿnuu-ndo ndecu-ndo. **12**Te duha ndùu tnúhu ní níhì-í nàcuáa cùu ndecu-ndo, chi dava-ndo càchí-ndó: “Yúhú cúu-í cuendá té Pãblú.” Te dava-ndo càchí-ndó: “Yúhú cúu-í cuendá té Àpolós.” Te dava-ndo càchí-ndó: “Yúhú cúu-í cuendá té Pèlú.” Te dava tucu-ndo càchí-ndó: “Yúhú cúu-í cuendá Xítóhó Jesucrìstú”, duha càchí-ndó. **13**Te vá dúcáⁿ cãháⁿ-ndó chi ñá túú nã daha Xítóhó Jesucrìstú ndécú chi ìⁿdìi-ni-gá. Te ñá díú yũhú té Pãblú ní xĩhí-í núú cùrúxí sã cuendá-ndó, te ni ñà túú ní sàndute-ndo cuendá sã yũhú cuu cuendá ñáhà-í xii-ndo. **14**Te táxãhu xii Yá Ndiõxí chi ñá díú nchàa-ndo ni dacuandute-í, chi té Crispú-ni ndìhi té Gãyú-ni ní dácúándùte-í-güedé. **15**Te xíãⁿ nõu vá cúú tnàhí cãháⁿ-ndó sã ñã sandute-ndo sã cúú cuendá ñáhà-í xii-ndo. **16**Te ní ndacu tucu iní-í sã tnàhá tucu ñáyiú cùu ndi mee té Èstéfanás ní dácúándùte-í, te diu-ná ñáyiú-áⁿ te sànuu sã ñà túú-gã nágá ñáyiú ni dàcuandute-í. **17**Te Xítóhó Jesucrìstú ñá túú ní tendaha ñaha-gá xii-í sã dácúándute-í ñáyiú, chi ní tendaha ñaha-gá xii-í sã càháⁿ-í tnúhu-gá núũ-yu, tnúhu sã càháⁿ nàcuáa naníhí tàhú-ó. Te ñá túú càháⁿ-í dàtná càháⁿ ñáyiú túha. Te ducaⁿ quìde-í cuendá sã nchòhó quíndáá váha iní-ndó tnũhu sã càháⁿ nàcuáa ní xĩhí Xítóhó Jesucrìstú núú cùrúxí. Chi núu na càháⁿ-í dàtná càháⁿ ñáyiú túha te nchòhó vá quíndáá iní-ndó tnũhu-áⁿ nàcuáa tàú-xi cunduu.

Sá cuendá Xítóhó Jesucrìstú cútnùní iní-ó sã ìo càhnu cuu Yá Ndiõxí

18Te nchaa ñáyiú ta xíta nihnu cuáháⁿ càchí-yu sã ñà túú nándĩhi tnúhu sã càháⁿ nàcuáa ní xĩhí Xítóhó Jesucrìstú núú cùrúxí, dico sã cúú-xí nchò ñáyiú sa ní naníhí tàhú, chi tnúhu-áⁿ cúú-xí ìⁿ tnúhu sã ñã taxi Yá Ndiõxí ndécú ndìhi-o cuendá ndacu-gá cada-gá nchaa nàcuáa cuìní-gá iní-ó, **19**te quèe ndáá-xi nàcuáa càháⁿ-gá núú tütú-gá núú càchí-xi:

Yúhú cada-í te nchaa ñáyiú túha vá nándĩhi-gá nchaa sã xìní
tnùní-yu,

te nchaa ñáyiú ío váha sàá díquí-xi vá nándĩhi-gá nchaa nàcuáa sàni
iní-yu.

Duha càchí Yã Ndiõxí núú tütú-gá.

20Te xíãⁿ cútnùní iní-ó sã ncháá ñáyiú sàni iní-xi sã ìo túha ndècu ñuyúú-a, ndìhi nchaa cue téé dàcuaha ñaha xii-yu nchaa tnúhu ní chídó

1 CORINTIOS 1

tnùnì ndii Moisés, ndihi nchaa ñáyiú ío váha sàá díquí-xi càháⁿ cuèndá nchaa sá ío ñuyíú-a, te nchaa ñáyiú-áⁿ càchí Yă Ndiöxí sá ñà túú nàndíhi nchaa sá xìnì tnùnì-yu sá cúú-xí-gă. **21**Te Yă Ndiöxí ío váha cùtnuní iní-gá nàcuáa quide-gá, chi ñá túú dàña-gá cundecu ndihi ñàhá-yu xii-gá sá cuèndá nchaa sá ñí sàá díquí méè-yu, te ducaⁿ quide-gá chi cuiní-gá sá cúndèdóho-yu tnúhu sá sánì iní-yu ñá túú nàndíhi. Te sá cuèndá tnúhu-áⁿ te naníhí tàhú-yu te núu na quèndáá iní ñáhă-yu xii-gá.

22Te cue ñáyiú isràél cuiní-yu quiní-yu sá vă yõo tnàhí ndàcu cada, te cue ñáyiú grìégú nchìcúⁿ nihnú-yu nchaa sá dácuaàha ñáyiú ío túha. **23**Dico nchoo yìhi-o càháⁿ-ó nùú ñáyiú sá Xítohó Jesucrìstú ní xíhí-gá núú cùrúxí. Te cue ñáyiú isràél ñá túú tnàhí tnàhá iní-yu cundèdóho-yu tnúhu-áⁿ. Te cue ñáyiú ñá túú cùu ñáyiú isràél càchí-yu sá ñà túú vèdana nàndíhi tnúhu-áⁿ. **24**Dico sá cúú-xí nchàa ñáyiú ní càháⁿ ñáhá Yă Ndiöxí chi cuèi cùú-yu ñáyiú isràél àdi ñá túú cùú-yu, dico ñáyiú-áⁿ càchí-yu sá sã cuèndá Xítohó Jesucrìstú cùtnùnì iní-yu sá ío càhnu cuu Yă Ndiöxí te ndècu ndihi-gá nchaa sá xìnì tnùnì-gá. **25**Te sá quidé Yă Ndiöxí càchí ñáyiú ñuyíú-a sá ñà túú nàndíhi, dico xiăⁿ ío-gá nàndíhi dàcúúxí sã sánì iní méè-yu. Te sá ñí xíhí Xítohó Jesucrìstú núú cùrúxí, xiăⁿ càchí ñáyiú sá ñă túú ní ñíhí ndéé Yă Ndiöxí cada-gá sá ñí sani iní-gá cada-gá. Dico sá dúcáⁿ ñí quide Yă Ndiöxí, xiăⁿ cúú-xí sã ío-gá ní ñíhí ndéé-gă ní quide-gá ìⁿ sá ñí sani iní-gá dàcúúxí sã sánì iní méé ñáyiú ñuyíú-a. **26**Te nchòhó ñáyiú ndècu ndihi-í ichi Xítohó Jesucrìstú, chí dándàcu iní nàcuáa ndècu-ndo cútnàhá ní càháⁿ ñáhá Yă Ndiöxí xii-ndo, chi sacú-ni-ndo tũha dàcúúxí ñáyiú ñá túú ndècu ichi-gá. Te ducaⁿ sàcú-ni-ndo tàxi tnuní-ndó, te diu-ni ducaⁿ sàcú-ndó nèhe ñáyiú sá yíñũhu núú-ndó. **27**Te ñáyiú ñá túú ndècu ichi Yă Ndiöxí càchí-yu sá ñà túú tnàhí túha dava-gá tnàha ñáyiú-yu, dico dava ñáyiú ñá túú tũha-áⁿ càháⁿ ñáhá Yă Ndiöxí xii-yu cundecú-yu ichi-gá, te cundecu ndihi ñaha-gă xií-yu, te ducaⁿ dándóo canúũ-yu nchaa ñáyiú càchí sá ío túha. Te càháⁿ tucu-gá ñáyiú càchí dava-gá ñáyiú sá ñà túú tnàhí tàú cunuu cundecú-yu ichi-gá, te ducaⁿ cundecu ndihi ñaha-gá xií-yu, te dándóo canúũ-yu nchaa ñáyiú càchí sá táxí tnùnì. **28**Te ducaⁿ Yă Ndiöxí càháⁿ-gá ñáyiú ñá túú tnàhí cùnuu cundecu ndihi-gá, ndihi ñáyiú quèe tĩhú nùú dàva-gá tnàha ñáyiú-xi, ndihi ñáyiú càchí-yu sá ñà túú vèdana nàndíhi, nchaa ñáyiú-áⁿ càháⁿ-gá cundecu ndihi-gá, te ducaⁿ quide-gá cuèndá dándóo canúũ-yu nchaa ñáyiú càchí sá ío cùnuu. **29**Te núu xiăⁿ ni ìⁿ ñáyiú vá cúú càchí-yu sá ío càhnu cuú-yu núú Yă Ndiöxí. **30**Dico nchòhó chi mee Yă Ndiöxí ní quide-gá ndécú-ndó ndihi Xítohó Jesucrìstú, te Xítohó Jesucrìstú ní quide-gá ní cutnùnì iní-ó sã Yă Ndiöxí cúú-gă Yaá ndécú ndihi nchaa sá xìnì tnùnì-gá. Te diu-ni Xítohó Jesucrìstú ní quide-gá cuèndá sá nchóó vă cúndècu-gá cuéchi-o nùú Yă Ndiöxí, te ducaⁿ cundecu

yiñuhu-o núú-gă, te nduu táhú-ó cùndecu-o ndihi-gá ni caa ni quíhíⁿ. ³¹Te sá dúcáⁿ quide-gá nõu xiãⁿ xíní ñuhu-xi cada-o nacúaa càháⁿ-xi núú tütú Yă Ndiõxí núú cächí-xi: “Vá cächí-ndó sã méé-ndó ïo cãhnu cuu-ndo, chi cachí-ndó sã Yàá cúú Xítóhó-ndó ïo cãhnu cuu-gá”, duha cächí-xi núú tütú-gá.

Tnúhu sá càháⁿ nàcuáa ní cuu ní xíhí Xítóhó Jesucristú núú cùrúxí

2 ¹Te nchòhó ñáyiu ndècu ndihi-í ichi Xítóhó Jesucristú sa nàha-ndo sá cùtnàhá ní quixi-í ní cáháⁿ-í tnúhu Yá Ndiõxí núú-ndó, te ñá túú ní cãháⁿ-í dàtná càháⁿ ìⁿ ñáyiu ío váha sàá díquí-xi, àdi datná càháⁿ ìⁿ ñáyiu ío túha. ²Chi cùtnàhá ní xíndecu ndihi ñaha-ï xii-ndo chi ní sani iní-í sá méé-ní cuendá Xítóhó Jesucristú cáháⁿ-í núú-ndó ndihi nacúaa ní cuu ní xíhí-gá, te ñu ducaⁿ ñi quide-í. ³Te cùtnàhá ní quexìo-í núú ndécú-ndó te ni ñá cùtnùní iní-í nása cada-í ní cùu, te ío ní quiyùhú iní-í ní cáháⁿ-í tnúhu-gá núú-ndó. ⁴Te cùtnàhá ní cáháⁿ-í nàcuáa ndùu tnúhu Xítóhó Jesucristú núú-ndó, te nàha-ndo sá Espíritú Yă Ndiõxí ní chindee ñàha-xi xii-í ní cáháⁿ-í tnúhu-gá núú-ndó, te tnúhu-áⁿ ñi quée-xi iní-ndó. Te ñá túú ní cãháⁿ-í ìⁿ tnúhu cãhnu núú-ndó tnúhu sá càháⁿ cue ñáyiu ío váha sàá díquí-xi. ⁵Te ducaⁿ ñi cuu cuendá sá nchòhó quíndáá iní-ndó tnúhu Yá Ndiõxí chi ní quide-gá sá vãha sá cúú-xí iní-ndó, te ñá díú sã cuendá tnúhu sá càháⁿ ñáyiu cächí sã ïo túha ducaⁿ ñi sándáá iní-ndó tnúhu-gá.

Espíritú Yă Ndiõxí quidé-xí cùtnuní iní-ó nàcuáa sàni iní-gá

⁶Te nchoo càháⁿ-ó tnúhu cãhnu núú ñáyiu sa ní níhí ndéé ndècu ichi Xítóhó Jesucristú. Te tnúhu-áⁿ ñá túú càháⁿ ñáyiu ñá túú ndècu ichi-gá, te ni cuè téé yìndaha ñaha xií-yu ñá túú càháⁿ-güedé tnúhu-áⁿ chi cue téé-áⁿ naa-güedé. ⁷Te tnúhu cãhnu-áⁿ cúú-xí tnúhu Yá Ndiõxí, te mee-gă ní cachí-gá ndéé cùtnàhá vátá ngãva-gá ñuyíú sã ncháá ñáyiu na quíndáá iní tnúhu-áⁿ te nduu táhú-yu cundecú-yu ndihi-gá núú ïo váha càa ndecu-gá ni caa ni quíhíⁿ. Te tnúhu-áⁿ ndúú yùhu-xi ni cuu. ⁸Te ni ìⁿ cue téé yìndaha cue ñáyiu ñuyíú-a ñá túú tècú tnùní-güedé tnúhu-áⁿ, chi núú dicó tècú tnùní-güedé tnúhu-áⁿ te vá catá càa-güedé Xítóhó Jesucristú núú cùrúxí cahni ñaha-güedě xii-gá ní cùu. Te ñu-ni Yaá-áⁿ ïo cãhnu cuu-gá. ⁹Dico ducaⁿ ñi cuu chi ní quee ndáá-xi nàcuáa càháⁿ-xi núú tütú Yă Ndiõxí núú cächí-xi:

Yá Ndiõxí sa ní sani iní-gá nchaa nàcuáa cada-gá sá cúú-xí cuendá nchaa ñáyiu cùu iní ñáhá xii-gá.

Te sá ñi sani iní-gá cada-gá cúú-xí sã vátá quíní-gá ñáyiu te ni vátá cùndèdóho-gá-yu,

te ni ñá túú tnàhí cùtnuní iní-yu nása cada-gá.

Duha cächí-xi núú tütú-gá. ¹⁰Te mee Yă Ndiöxí ní cachí-gá sá Espíritú-gá cada-xi te nchoo cùtnuní iní-ó nchàa nacuáa sàni iní-gá cada-gá, nõu xíăⁿ ducaⁿ tècú tnùní-ó vitna, chi Espíritú-gá xìní-xi nchaandi túhú nàcuáa sàni iní-gá cada-gá.

¹¹Te ñá íⁿ ñăyiu xìní ndáá-yu nàcuáa sàni iní ingá ñăyiu, chi mee ñăyiu-áⁿ xìní ndáá-yu nchaa nàcuáa sàni iní-yu. Te ducaⁿ sãtnahá-xi cùu Yă Ndiöxí chi medi-ni Espíritú-gá xìní-xi nchaa nàcuáa sàni iní-gá. ¹²Te nchoo chi Yă Ndiöxí ní taxi-gá Espíritú-gá ndécú ndìhi-o, te ñá díú ñùyíú-a ducaⁿ ni quèe espíritú ní ngúndecu ndìhi-o. Te ducaⁿ ñí taxi-gá Espíritú-gá ndécú ndìhi-o cuendá ducaⁿ cùtnuní iní-ó nàcuáa ndùu nchaa sá vãha sá dícó ducaⁿ ñí taxi-gá ndécú ndìhi-o. ¹³Te cuendá nchaa sá vãha-áⁿ cãháⁿ-ndí, te cãháⁿ-ndí nàcuáa dàcahu iní ñáhá Espíritú Yă Ndiöxí xii-ndí, te ñá túú cãháⁿ-ndí nàcuáa cãhu iní ñăyiu ñuyíú-a cãháⁿ-yu, te diu-ni nchaa tnúhu dàcahu iní ñáhá Espíritú-gá xii-ndí cãháⁿ-ndí, diu-ni nchaa xíăⁿ dánèhé-ndí nchaa ñăyiu ndècu ndìhi tucu Espíritú-gá.

¹⁴Te ñăyiu ñá túú ndècu ndìhi Espíritú Yă Ndiöxí ñá túú tnàhá iní-yu nàcuáa ndùu tnúhu dàtecú tnúhu ñaha Espíritú-gá xii-yu, te ni ñà túú tècú tnùní-yu, te cächí-yu sá ñà túú nàndíhi-xi. Te ducaⁿ chi mee-ni nchàa ñăyiu ndècu ndìhi Espíritú-gá tècú tnùní-yu nàcuáa ndùu tnúhu-áⁿ. ¹⁵Te cue ñăyiu ducaⁿ ndècu ndìhi Espíritú Yă Ndiöxí cùtnuní ndáá iní-yu ná cúú nchàa sá vãha, te vá yõo íⁿ xìní nchaa nàcuáa sàni iní-yu. ¹⁶Te núú tütú Yă Ndiöxí cächí-xi: “Vá yõo íⁿ xìní nàcuáa sàni iní Yă Ndiöxí, núu xíăⁿ vá yõo íⁿ ndacu ná danèhé ñáhá xii-gá”, duha cächí-xi núú tütú-gá. Te nchoo chi íⁿ-ni sàni iní-ó ndìhi Xítóhó Jesucrìstú.

Cue tée xiquide chiúⁿ Yă Ndiöxí

3 ¹Te nchòhó ñăyiu ndècu ndìhi-í ichi Xítóhó Jesucrìstú cächí tnúhu-í xii-ndo sã ñă ní ñìhì-í nàcuáa cada-í cãháⁿ-í tnúhu-gá núú-ndó dàtná cãháⁿ-í núú nchàa ñăyiu quide nchaa nacuáa cãháⁿ Espíritú Yă Ndiöxí, chi ní cãháⁿ-í núú-ndó dàtná cãháⁿ-í núú nchàa ñăyiu cùnuu nchaa sá cuèhé sá dúhá iní-xi, te ní quide ñaha-í xii-ndo dàtná cue ñăyiu íchí ñí sándáá iní tnúhu Xítóhó Jesucrìstú, núu xíăⁿ ducaⁿ ñí cãháⁿ-í núú-ndó. ²Te ní quide ñaha-í xii-ndo dàtná íⁿ déhe yiquíⁿ vitna sadi camá, te ñá túú ní quide ñaha-í xii-ndo dàtná cue landú sa xèxi dítá, chi ní dánèhé ñáhà-í xii-ndo íⁿ sá ñà túú tnàhí úhú tecú tnùní-ndó, te ñá túú ní dànèhé ñáhà-í xii-ndo íⁿ sá xító-í sá vã tècú tnùní-ndó. Te quide cuendá-í sá díú-ní dùcaⁿ vá tècú tnùní-ndó ndèe vitna te núu na dànèhé ñáhà-í xii-ndo nchàa dava-gá tnúhu. ³Te ducaⁿ chi quide-ni-ndo nacuáa sàni iní méé-ndó, chi ndècu-ni-ndo ichi cuédú íní, te nàá ndìhi tnàha-ni-ndo, te ñá túú tnàhí cùu íⁿnuu-ndo ndecu-ndo. Te xíăⁿ cùtnuní sá méé-ní nchàa nacuáa sàni iní

mée-ndó quide-ndo, te xiquide-ndo dàtná quidé nchaa ñáyiú ñá túú ndècu ichi Xítohó Jesucristú. ⁴Te dava-ndo càchí-ndó: “Yúhú cúu-í cuendá té Păblú.” Te dava-ndo càchí-ndó: “Yúhú cúu-í cuendá té Àpolós”, duha càchí-ndó. Te sá dúcáⁿ càháⁿ-ndó xíăⁿ cútnùní sá quidé-ní-ndó mée-ni nchaa nacuaa sàni iní mée-ndó.

⁵Te yúhú té Păblú càchí tnúhu-í xii-ndo sã ñà túú cùnuu-í, te ni té Àpolós ñá túú cùnuu-dé chi dícó cue téé xínu cuechi núú Yă Ndiöxí cúu-ndĭ, te ní cáháⁿ-ndí tnúhu-gá núú-ndó, núú xíăⁿ ní sándáá iní-ndó. Te ndi díĭⁿ ndi díĭⁿ ndùu chiuⁿ ní táhú Yă Ndiöxí cada-ndí. ⁶Te yúhú cúu-í dàtná ĩⁿ téé chĭhi tatá chi dàcaháⁿ ñáhà-í xii-ndo tũha-ndo ichi Yá Ndiöxí. Te té Àpolós cúu-dě dàtná ĩⁿ téé nàcuhñu chi téé-áⁿ ndécú-dě dánèhé ñáhà-dě xii-ndo tnũhu-gá. Te Yá Ndiöxí cúu-gă Yaá quidé sàhnu tatá ní chĭhi-í-áⁿ, te duha càháⁿ-í chi diu-gá quidé-gă tá nihí ndéé-ndó ndècu-ndo ichi-gá. ⁷Te núú xíăⁿ ni téé chĭhi tatá te ní téé nàcuhñu ñá túú cùnuu-güedé, dico Yá Ndiöxí ío cùnuu-gá chi diu-gá quidé-gă xínu tatá-áⁿ te sàhnu-xi. ⁸Te ĩⁿ-ni cùu téé chĭhi tatá ndĭhi téé nàcuhñu. Te ducaⁿ sãtnahá-xi cùu nchúhú cue téé xiquide chiúⁿ Yá Ndiöxí, te nàcuáa ndùu chiuⁿ ní quide-ndí te ducaⁿ cùnduu táhú taxi Yá Ndiöxí nduu táhú-ndĭ. ⁹Te nchòhó cúu-ndó dàtná ĩⁿ xichi núú ñĭ quée tatá, te nchúhú cúu ĩⁿnuu-ndí quidé chiúⁿ-ndí xíáⁿ. Te ducaⁿ sãtnahá-xi cùu-ndo chi cùu cuendá ñáhà Yă Ndiöxí xii-ndo, te nchúhú cúu ĩⁿnuu-ndí quidé-ndĭ chiúⁿ-gá.

Te cùu tucu-ndo datná ĩⁿ vehe sá vítná sáá, te ducaⁿ sãtnahá-xi cùu-ndo chi Yá Ndiöxí quidé-gă tá sàhnu nihnu-ndo ichi-gá cuáháⁿ. ¹⁰Te yúhú cúu-í dàtná ĩⁿ téé cùnuu dacao vehe te ní tava-í cimientú-xi, te dĭĭⁿ cue téé véxi dàcaa-güedé ndóho, te ĩⁿ ĩⁿ cue téé-áⁿ ío xĭni ñuhu-xi cada cuendá-güedé nàcuáa dacaa-güedé. Núú ducaⁿ sãtnahá-xi cùu yúhú chi Yá Ndiöxí ní taxi-gá chiúⁿ quide-í te chĭndee ñaha-gá, chi díhna-gá-í ní quixi-í ní cáháⁿ-í tnúhu Xítohó Jesucristú núú-ndó, te dĭĭⁿ cue téé véxi dàcuaha ñaha-ná xii-ndo tnũhu-gá, te ĩⁿ ĩⁿ cue téé-áⁿ ío xĭni ñuhu-xi cada cuendá-güedé nàcuáa dacuàha ñaha-güedé xii-ndo tnũhu-gá. ¹¹Te cimientú vehe-áⁿ cada iní-ó sã cúu-xí mée Xítohó Jesucristú, te ducaⁿ chi yúhú ní dánèhé ñáhà-í xii-ndo ñĭ ngúndecu ndĭhi-ndo Xítohó Jesucristú, te vá yõo-gá cundecu ndĭhi-ndo chi ĩⁿdĭi díĭ-ni-gă ndécú. ¹²Te dava cue téé dàcaa-güedé vehe váha te chĭhi-güedé díhúⁿ cuááⁿ, ndĭhi díhúⁿ cuixíⁿ, ndĭhi yúú sã ío vii càa. Te dava-güedé dácàa-güedé vehe vítú, te dava-güedé dácàa-güedé vehe ité, te dava-güedé dácàa-güedé vehe tnuvixiⁿ. ¹³Te sáá nduu te nchaa vehe-áⁿ cáyú-xi, te vehe vítú-ăⁿ ndĭhi vehe ité-áⁿ ndĭhi vehe tnuvixiⁿ-áⁿ ndoo ndoo cáyú, te nchaa vehe váha-áⁿ vă cáyú-xi cuĕi na yăha ñuhú. Te nchaa cue téé ní dácáá vèhe váha-áⁿ cada iní-ó sã cúu-güedě ñáyiú ío váha quide chiuⁿ Yá Ndiöxí. Te nchaa cue téé ní dácáá vèhe vítú, ndĭhi cue téé ní

dácaá vèhe ité, ndihi cue téé ní dácaá vèhe tnuvixiⁿ cada iní-ó sã cúú-güedè ñáyiú ñá túú cuíní cada chiúⁿ Yá Ndiöxí nàcuáa tàú-xi cunduu. Te sáá nduu te cutnùní nàcuáa ndùu chiuⁿ ní quide ìⁿ ìⁿ ñáyiú, chi Yá Ndiöxí cáháⁿ-gá nàcuáa ndùu chiuⁿ ní quide ìⁿ ìⁿ ñáyiú ní quide chiúⁿ-gá. **14**Te cue ñáyiú ío váha xíquide chiúⁿ Yá Ndiöxí te cùdíi chiúⁿ quidé-yu, te ñáyiú-áⁿ ñhĩ-yu sá ndúú tãhũ-yu. **15**Te cue ñáyiú ñá túú quide chiuⁿ Yá Ndiöxí nàcuáa tàú-xi cunduu, te vá cùdíi chiúⁿ ní quidé-yu chi cuíta te ndóo-ná-yu duha, dico mèé-yu chi naníhí tãhũ-yu.

16Te yúhú càháⁿ-í dóho-ndo dándacu-í iní-ndó sã cúú-ndó dàtná vehe Yá Ndiöxí, chi Espíritú-gá ndécú ndihi ñaha-xi xii-ndo. **17**Te núu yoo na dànaa ñaha xii nchohó ñáyiú cùu veñúhu-gá, te Yá Ndiöxí danàa ñaha-gá xii ñáyiú-áⁿ, te ducaⁿ càda-gá chi nchòhó cúú-ndó ñáyiú cùu cuendá-gá.

18Te vá dándàhú-ndó mèe-ndo sá ìo túha-ndo. Te núu ìo dava-ndo sàni iní-ndó sã túha-ndo dàtná sání iní cue ñáyiú ñá túú ndècu ichi Yá Ndiöxí, te cada-ndo sã cúú-ndó dàtná ñáyiú ñá túú tnàhí túha, te ducaⁿ te cuu ndisa-ndo ñáyiú túha sá cúú-xí Yá Ndiöxí. **19**Te nchaa sá xìní tnùní nchaa ñáyiú càchí sá ìo túha ñá túú ndècu ichi Yá Ndiöxí ñá túú nàndíhi-xi sá cúú-xí-gã. Te càchí-xi núú tütú-gá: “Nchaa ñáyiú càchí sá ìo túha te Yá Ndiöxí dandòo canúú ñáhá-gã xíi-yu núú nchàa sá quídè-yu”, duha càchí-xi núú tütú-gá. **20**Te càchí tucu-xi ìngá xichi: “Yá Ndiöxí cùtnùní iní-gá nchaa nàcuáa sàni iní ñáyiú càchí sá ìo túha. Te nchaa nàcuáa sàni iní-yu-áⁿ càchí-gá sá ñà túú vèdana nàndíhi-xi”, duha càchí-xi núú tütú-gá. **21**Núu xíáⁿ càháⁿ-í dóho-ndo sã vã càchí-ndó sã nchũhú cue téé dànehé ñáhá xii-ndo tnúhu-gá ío càhnu cuu-ndí. Te nchaa sá ìo ñuyúú-a cùu-xi sá vãha sá cúú-xí-ndó. **22**Te cuèi yúhú ndihi té Àpolós ndihi té Pèlú ndécú-ndí sá cúú-xí-ndó, te cuèi nchaa sá ìo ñuyúú-a te cuèi nchaa nduu ndècu-ndo te cuèi sá cùú-ndó dico nchaa cùu-xi sá vãha sá cúú-xí-ndó. Te cuèi nchaa sá ndécú tnàvíí, te cuèi nchaa sá cóo ndèé cuèé-gá nchaa cùu-xi sá vãha sá cúú-xí-ndó. **23**Te mee-ndo ndècu-ndo sá cúú-xí Xìtohó Jesucrìstú, te mee Xìtohó Jesucrìstú ndécú-gã sá cúú-xí Yá Ndiöxí.

Nàcuáa ndùu chiuⁿ quide cue téé ní táuchíúⁿ Xìtohó Jesucrìstú cáháⁿ tnúhu-gá

4 **1**Te cada cuendá-ndó sã nchũhú dicó-ni cue téé xínu cuechi núú Xìtohó Jesucrìstú cúú-ndí, te chiúⁿ-áⁿ ñí taxi Yá Ndiöxí quidé-ndí càháⁿ-ndí tnúhu sá ñí cachí-gá yíyùhu ni cuu. **2**Te xini ñuhu-xi sá ncháá ñáyiú ducaⁿ ñí sãñaha Yá Ndiöxí chiúⁿ quidé-yu cada ndáá-yu cadá-yu chiúⁿ-áⁿ. **3**Te yúhú ñá túú quide cuendá-í ñuu nása ndùu tnúhu càháⁿ-ndó cuendá-í ñuu cùu-í téé váha àdi ñá túú cùu-í. Te diu-ni ducaⁿ ñá túú quide cuendá-í ñuu nása-gá càháⁿ nchaa dava-gá ñáyiú cuendá-í. Te ni mèe-í ñá

túú cãháⁿ-í nũu cùu-í tée váha àdi ñá túú cùu-í. ⁴Te sãnuu iní-í sá ñà túú ñà cúmãni-í núú Yã Ndiõxí, dico ñá díú sã xĩãⁿ te cachí-í sá ñã túú cuèchi-í ndécú nũú-gã, chi mee-gã náhá ndãá-gá te núu nása quide-í ndécù-í. ⁵Te nchòhó vá cãháⁿ-gá-ndó sã ñà túú cùndáá ñáyiu núú Yã Ndiõxí, chi vátá sàá-gá nduu cùndáá cuèchi-yu. Te na sàá nduu quixi tucu Xítohó Jesucristú te dàvá-áⁿ dàtúu-gá nchaa sá quidě-yu, nchaa sá ñà túú xìní-ó quidé-yu vitna, te ducaⁿ dàtúu-gá nchaa nãcuáa sãni iní-yu. Te Yá Ndiõxí cãháⁿ váha-gá cuendá nchaa ñáyiu ní quide váha.

⁶Te nchòhó ñáyiu ndècu ndihí-í ichi Xítohó Jesucristú, càcunehe-í té Àpolós ndihí yúhú núú-ndó dànehé ñáhà-í xii-ndo nãcuáa cada-ndo cuendá ducaⁿ cùu-xi ìⁿ sá váha sá cúu-xí-ndó, ndihí cuendá sá nchòhó canchicúⁿ nihnu-ndo càda-ndo mee-ni nchaa nãcuáa yòdo tnuní núú tütú Yã Ndiõxí. Te ducaⁿ te vá càchí-ndó sã ìⁿ tée cãháⁿ tnúhu Yá Ndiõxí ío-gá càhnu cuu-dé dàcúxí ìngá-dé. ⁷Te nchòhó vá càchí-ndó sã ìo-gá cùnũu-ndo dacúxí dàva-gá ñáyiu chi Yá Ndiõxí ní quide-gá ní ngúndecu ndihí-ndo nchàa sá xìní tnùní-ndó. Te mee-gã ducaⁿ ñi quide-gá ¿Te ná cuendá nchòhó ducaⁿ quide cahnu-ndo mee-ndo? Te quide-ndo datná tnúhu sá mée-ndó ñi quide-ndo dùcaⁿ ní ngúndecu ndihí-ndo nchàa sá xìní tnùní-ndó.

⁸Te nchòhó quidé-ndó sã ñà túú tnàhí-gá ná cúmãní-ndó nũú Yã Ndiõxí, te quide-ndo sá ni ñihí-ndó nchàa sá cuiní-ndó nũú-gã ndécú ndihí-ndo, te sãnuu sá cúu-ñã-ndó dàtná cue tée yìndaha ñáyiu, te nchúhú ñá túú cùu ìⁿnuu ndihí ñaha-ndí xii-ndo quìndaha ndihí ñaha-ndí xii-ndo ñáyiu, ite váha-ni te núu dìcò ndisa sá yìndàha-ndo ñáyiu chi tnàhá nchúhú ní tnahá ndihí ñaha-ndí xii-ndo quìndaha-ó-yu te núu dìcò cúu-xí ìⁿ sá ndàá dico ñáhá! ⁹Te yúhú quidé cuendá-í sá nchũhú cue tée ní táuchíúⁿ Xítohó Jesucristú cãháⁿ tnúhu-gá núú ñáyiu ní cachí Yã Ndiõxí sá cúu-ndí cue tée ñá túú nãndíhi sá cúu-xí dàva-gá ñáyiu. Te ní cachí tucu-gá sá cúu-ndí dàtná cue ñáyiu sa ní tnahá òré cuú-xi quíhíⁿ nacháhu cuèchi-xi, te nchaa ñáyiu cùnũhu ñahá-yu xii-ndí sá dúcáⁿ ndòho-ndí, te tnàhá nchaa espíritú cùnũhu ñaha-xi xii-ndí. ¹⁰Te cuendá sá xínú cuèchi-ndí núú Xítohó Jesucristú, xĩãⁿ cúu-ndí dàtná cue tée ñá túú vèdana nãndíhi sá cúu-xí ñáyiu. Te nchòhó quidé-ndó sã cúu-ndó ñáyiu ío túha ndècu ndihí Xítohó Jesucristú. Te ñáyiu càchí-yu sá nchũhú cúu-ndí cue tée ñá túú ndàcu cada ìⁿ sá cãdá sã cúu-xí Yã Ndiõxí. Te nchòhó quidé-ndó sã cúu-ndó ñáyiu ío váha ndàcu quide ìⁿ sá sání iní-ndó sã cúu-xí-gã. Te cue ñáyiu dàquee tihú ñáhã-yu xii-ndí, te nchòhó nẽhẽ-yu sá yìñũhu núu-ndó. ¹¹Te nchúhú chi nchaa-ni nduu ío ndòho-ndí, chi xihí-ndí docó, yìchí-ndí ndute, te ñá túú dõó-ndí, te nchaa ñáyiu quide úhú ñáhã-yu xii-ndí, te ni vèhe-ndí ñá túú ndèé cáá cùndecu-ndí. ¹²Te ío ndòho-ndí quidé chiuⁿ-ndí ñihí-ndí sá

xéxi-ndí. Te cue ñáyiú xīcuèhé ñáhă-yu xii-ndí dico xìcáⁿ táhú-ndí núú Yă Ndiöxí cuendá-yu, te ñá cúú tnàhí quiní ndeé ñáhă-yu xii-ndí dico quide cahnu iní-ndí nchaa sá quidé ñàhá-yu. ¹³Te mee-ni tnūhu cuèhé tnūhu duha càháⁿ-yu cuendá-ndí dico sàcahnu iní-ndí te dāsahú-ndí-yu mee-ni tnūhu váha. Te cāchí-yu sá cúú-ndí dàtná ìⁿ sá ñà túú-gă vĕdana nāndihī, te nchaa-ni nduu ducaⁿ càháⁿ-yu xăhăⁿ-yu xii-ndí.

¹⁴Te yúhú duha càháⁿ-í núú tūtú-a dāsahú ñáhà-í xii-ndo, dico ñá díú tnūhu sá cúú càháⁿ núú-ndó càháⁿ-í. Te duha càháⁿ-í dóho-ndo chi quide iní-í sá sūúni dàtná déhe mee-í cúú-ndó chi ío cùu iní ñáhà-í xii-ndo. ¹⁵Te nchaa-o ndĕcu-o ichi Xítohó Jesucrístú vitna, dico yúhú cúú-í tée díhna nuu ñí dánèhé ñáhá xii-ndo nacúáa ndùu tnūhu sá càháⁿ nācuáa naníhí tàhú-ó, núú xǎⁿ cúú-í dàtná tătá-ndó. Te cuēi vāi vihi cue tée na quixi-güedé danèhé ñáhá-güedĕ xii-ndo tnūhu-gá dico ìⁿ ði-ni yúhú cúú-í tée díhna nuu-gă ní dánèhé ñáhá xii-ndo tnūhu-gá. ¹⁶Núu xǎⁿ càháⁿ-í dóho-ndo să cānchĭcúⁿ nihnu-ndo càda-ndo nchaa nacúáa quide-í.

¹⁷Te xǎⁿ nūu sa ní tendaha-ĭ té Timùteú véxi coto ñaha-dĕ xii-ndo, te tée-áⁿ ĩo cùu iní-í-dé te quide ndáá-dé, te cùu-dé dàtná déhe-í chi yúhú ní sanu ichi-í-dé ichi Xítohó Jesucrístú, te tée-áⁿ cachí tnūhu-dé xii-ndo nchāa nacúáa quide-í ndĕcù-í ichi-gá. Te ðiu-ni nācuáa na cāchí tnūhu-dé-áⁿ ðiu-ni ducaⁿ quide-í nchaa xichi núú tàcá ñáyiú dàcuaha tnūhu Xítohó Jesucrístú. ¹⁸Te dava nchòhó ío quide cahnu-ndo mee-ndo chi sàni iní-ndó să vă quixí-gă-í quixi coto ñaha-ĭ xii-ndo. ¹⁹Dico núu mee Yă Ndiöxí ná cāchí-gá te ío ndĭhi quixi coto ñaha-ĭ xii-ndo, te dàvá-áⁿ quiní-í te núu nása quide nchaa ñáyiú ducaⁿ ĩo xĭquide cāhnu mee-xi-áⁿ ndĕcŭ-yu ichi Xítohó Jesucrístú. Te vá cádá cuendá-í tnūhu càháⁿ-yu chi chiuⁿ quidé-yu cada cuendá-í. ²⁰Te vitna yĭndaha ñaha Yá Ndiöxí xii-o, te chĭndee ñaha-gá xii-o quide-o nchaa sá vāha sàni iní-ó quide-o te ñá díú mĕe-ni sá càháⁿ-ó. ²¹Te ío chí cání ĩní nūu ndĕdacāa sá vāha-gá cada-í òré ná quĕxìo-í núú ndĕcú-ndó, núu sá tĕnāá ñáhà-í xii-ndo àdi sá càháⁿ ndĭhi ñaha-ĭ xii-ndo ndĭhi tnūhu vii tnūhu váha nācuáa cutnūni iní-ndó să cúú ĩní ñáhà-í xii-ndo.

Īⁿ cuéchi cāhnu vihi

5 ¹Te yúhú sa ní níhí ndăá-í tnūhu nācuáa cùu ndĕcu-ndo, chi ìⁿ tée ndĕcu ndĭhi-ndo ndĕca-dé nāná chāhá-dé. Te xǎⁿ cúú-xí ìⁿ cuéchi cāhnu vihi, chi ndĕé nchaa ñáyiú ñá túú ndĕcu ichi Yá Ndiöxí cāchí-yu sá vă cúú tnàhí ducaⁿ càda-o. ²Te nchòhó ío quide cahnu-ni-ndo mee-ndo xĭndĕcu-ndo! ¹Te tàú-ndó să cúndĭyí-ndó ndĭxi cuéchi iní-ndó să dúcáⁿ cùu ndĕcu-ndo ni cuu! Te tée ducaⁿ quide-áⁿ xĭní ñūhu-xi sá vă dáñá-gă-ndó ñĭhí tnáhá ndĭhi ñaha-dé xii-ndo ni cùu dico ñá túú dùcaⁿ quide-ndo. ³Te

yúhú ñá túú ndècu ndìhi ñaha-í xii-ndo dico dàtná tnúhu sá ndécú ndìhi ñaha-í xii-ndo chi ducaⁿ-ni ïo ñùhu iní ñáhà-í xii-ndo. Te yúhú càchí-í sá náchăhu tée-áⁿ cuëchi-dé sá dúcáⁿ quide-dé, te diu-ni ducaⁿ căháⁿ-í núú-ndó te núu dícó ndécú ndìhi ñaha-í xii-ndo. ⁴Te òré nătàcá-ndó căháⁿ ndìhi-ndo Yă Ndiöxí te diu-ni Xítohó Jesucrístú ñá túú dàña ndée-gá chindèe ñaha-gá xii-ndo, te òré-áⁿ cada-ndo nàcuáa cuení Xítohó Jesucrístú cada-ndo, te cada iní-ndó să tnàhá-í ndécú ndìhi ñaha-í xii-ndo. ⁵Chi tàú-xi sá tée ducaⁿ quide-áⁿ daquèe tîhú-ndó-dě, te ducaⁿ te sácuihná dandòho ñaha-xi xii-dé cuëi na cùú-dé, dico na sàá nduu te nduu táhú-dě cundecu-dé ndìhi Xítohó Jesucrístú.

⁶Te nchòhó ñá túú ndùu váha-xi sá càchí-ndó să ïo cahnú cuu-ndo. Te xíní-ndó să cuëi luha-ni levadùrá ná quïhu yuchi cuáha pàá dándàa-xi cuëi luha-ni nà quïhu te nihí-ni yuchi sàháⁿ ndoho-xi. Te ducaⁿ sătnahá-xi cùu nchohó chi núu ndècu ndìhi-ndo ïiⁿ ñáyiu quide sá ñá túú váha te nchaa-ndo ñá túú-gă cùú váha iní-ndó ndècu-ndo. ⁷Te xini ñuhu-xi sá cádá-ndó dàtná quidé cuè ñáyiu quide vico pascuá, chi ñá túú chihí-yu levadùrá yuchi cuáha pàá xéxi-yu nduu quidé-yu vico-áⁿ. Te sá quïhu pàá-áⁿ cada iní-ó să cùú-xí nchàa sá cuèhé sá dúhá nï xóo cada-ndo. Te vá cádá-gă-ndó nï ïiⁿ sá cuèhé sá dúhá, te ducaⁿ te cuu-ndo ñáyiu váha chi sa ní nduu ndoo ní nduu nine iní-ndó. Te cue mbéé cue quiti ní xóo cahni-güedé nduu pàscuá cue quiti-áⁿ cada iní-ó să cùú-güèdi datná Xítohó Jesucrístú nàcuáa ní xihí-gá núú cùrúxí. ⁸Te núu xíăⁿ xíní ñùhu-xi sá vă cádá-gă-ndó nï ïiⁿ sá cuèhé sá dúhá să nï xóo cada-ndo, te ni vă cùhúⁿ-gă iní-ndó te ni vă cádá-gă-ndó, te ni yùhu ni iní-ná-ndó càda-ndo mee-ni sá váha.

⁹Te tutú sá sà ní dáquixí-í ndaha-ndo nï cachí-í sá vă nihí tnàhá-ndó ndìhi cue ñáyiu ndècu ichi díf iní. ¹⁰Te sá dúcáⁿ căháⁿ-í núú tütú ní dáquixí-í ndaha-ndo te vá cání iní-ndó să yúhú càchí-í sá vă cùú-gă tnahá tnúhu-ndo ndìhi cue ñáyiu ndècu ichi cuehé ichi duha, ndìhi ñáyiu ndècu ichi díf iní, ndìhi ñáyiu xìho nchaa sá ïó ñuyú, ndìhi ñáyiu dùhu sá ndécú ndìhi tnahá ñáyiu-xi, ndìhi ñáyiu quide cahnú sá càchí-yu cùu ndiöxí te ñá ndàá sá ndiöxí cùú-xí chi dícó cue tée ñuyú-a ní cadúha nchaa xíăⁿ, chi núu ducaⁿ na càda-ndo vá tnàhá tnúhu-gă-ndó ndìhí-yu te xini ñuhu-xi sá vă cùndècu-gă-ndó nùú ndécü-yu. ¹¹Te ñá túú dùcaⁿ quee-xi nacuáa căháⁿ-í núú tütú-í, chi yúhú càchí-í sá vă cùú tnàhá tnúhu-ndo ndìhi ñáyiu càchí sá ndécú ichi Xítohó Jesucrístú te ñá ndàá sá ndécü-yu ichi-gá. Te núu cùú-yu ñáyiu ndècu ichi díf iní, àdi cuú-yu ñáyiu xìho nchaa sá ïó ñuyú-a, àdi cuú-yu ñáyiu quide cahnú nchaa sá càchí-yu cùu ndiöxí te ñá ndàá chi dícó cue tée ñuyú-a ní cadúha nchaa xíăⁿ, àdi cuú-yu ñáyiu yiti yùhu-xi, àdi cuú-yu ñáyiu quïhu, àdi cuú-yu ñáyiu dùhu sá ndécú ndìhi

tnaha ñáyi-xi, te nchaa ñáyi ducaⁿ cächí sá ndécú ìchi-gá te ñá ndàá te ducaⁿ xíquidé-yu, te ni vǎ cúú ñihí tnáhá-ndó ndìhí-yu caxi-ndo ndìhí-yu. 12-13 Te ñá díú yǎhú cúù-í tée cǎháⁿ cuendá nchaa ñáyi ñá túú ndècu ichi Xítóhó Jesucristú nǎu quide ndáá-yu àdi ñá túú quide ndáá-yu ndécú-yu, chi mee Yǎ Ndiǒxí cǎháⁿ-gá te núu nása quidé-yu ndécú-yu. Dico nchòhó chi tàú-ndó càda cuendá-ndó nǎu nása quide cue ñáyi ndècu ndìhi-ndo ichi Xítóhó Jesucristú. Núu xǎⁿ xíní ñùhu-xi daquee tǎhú-ndó tǎe ducaⁿ ñà túú quide váha ndècu ndìhi-ndo-áⁿ, te vá dáñá-gǎ-ndó ñihí tnáhá ndìhi ñaha-dé xii-ndo.

Nàcuáa tàú-xi cada ñáyi ndècu ichi Xítóhó Jesucristú te núu ñá túú ndècu ndìhi váha tnáhá-yu

6 ¹Te dava nchòhó òré ñá túú ndècu ndìhi váha tnàha-ndo te cùyii-ndo cuáháⁿ-ndó nǎu cuè tée cùchiuⁿ ñá túú ndècu ichi Xítóhó Jesucristú sàcáⁿ cuéchi-ndo, te ñá túú dùcaⁿ taú-xi cada-ndo chi núu cuè tée ndècu ichi-gá ducaⁿ tàú-ndó quǎhíⁿ-ndó càcáⁿ cuéchi-ndo. ²Te nchòhó sa nàha-ndo sá ncháá ñáyi cùu cuendá Yǎ Ndiǒxí sáá nduu cǎháⁿ-yu te núu ní quide ndáá nchaa dava-gá ñáyi àdi ñá túú ní quide ndáá-yu, te nchòhó tnáhá-ndó cùu-ndo ñáyi ducaⁿ cǎháⁿ, te núu ducaⁿ te cutnùní iní-ndó sǎ ndácú-ndó càda ndáá-ndó nchàa cuéchi sá ñá túú ùhú cundáá vitna ndècu-ndo ñuyú-a. ³Te nchòhó sa nàha-ndo sá ncháá ndǎe cue espíritú xínú cuèchi núu Yǎ Ndiǒxí sáá nduu cǎháⁿ-ó te núu nása quide-xi ndecu-xi. iNúu xǎⁿ cùtnùní iní-ó sǎ úúⁿ-gǎ ndacu-o càda ndáá-ó nchàa cuéchi sá ìó ñuyú-a! ⁴Te núu ìó dava-ndo ìó nása cùu ndecu-ndo te xǎnàá-ndó, te vá quǎhíⁿ-ndó càcáⁿ cuéchi-ndo nǎu cuè tée ndèhe-ndo sá ñà túú ndècu-güedé ichi Yǎ Ndiǒxí, dico nchòhó chi da núu cuè tée-áⁿ cuáháⁿ-ndó sàcáⁿ cuéchi-ndo. ⁵Te duha cǎháⁿ-í cuendá cucahaⁿ núu-ndó chi ñá túú quide váha-ndo sǎ dúcáⁿ quide-ndo. ¿Te náa dìcò-nǎ ñá túú tnàhí ìiⁿ tée cùtnuní iní-xi nàcuáa cada ndáá cuéchi-ndo ndècu ndìhi-ndo ichi Xítóhó Jesucristú-ǎⁿ? ⁶Te nchòhó, ñá túú quide váha-ndo, chi dava-ndo cuáháⁿ-ndó nǎu cuè tée ñá túú ndècu ichi Xítóhó Jesucristú sàcáⁿ cuéchi-ndo cuendá dava-gá cue ñáyi ndècu ndìhi-ndo ichi-gá.

⁷Te ñá túú quide váha-ndo sǎ dúcáⁿ nàa ndìhi tnàha-ndo te cuáháⁿ-ndó sàcáⁿ cuéchi-ndo, te váha-gá sá cǎdá cǎhnu iní-ndó cuèi nǎndi na càda ñaha tnaha ñáyi-ndo xii-ndo cuèi dùhú-yu sá ndécú ndìhi-ndo dico cada cǎhnu-ni iní-ndó. ⁸Dico nchòhó chi ñá túú quide cǎhnu iní-ndó chi da uuⁿ-gá ñá túú quide váha-ndo sàcúú-xí tnàha ñáyi-ndo, chi cùu úhú iní-ndó-yu, te dùhu-ndó-yu, te ndǎe méé-ndó nàcuáa ndècu-ndo ichi Xítóhó Jesucristú ducaⁿ quide tnaha-ndo.

⁹Te nchòhó sa nàha-ndo sá ncháá ñáyi ndècu ichi cuehé ichi duha vá ndúú tãhũ-yu cundecú-yu núú ndécú Yã Ndiöxí táxí tnùní-gá, núu xíãⁿ vá cání ìní-ndó sã ñáyi-áⁿ nduu tãhũ-yu cundecú-yu ndihi-gá. Te ni cuè ñáyi ndècu ichi díí ìní, te ni cuè ñáyi quide cahnu nchaa sá cãchí-yu cùu ndióxí te ñá ndáá chi òcò cue tée ñuyíú-a ní cadúha nchaa xíãⁿ, te ni cuè tée cãháⁿ ndihi ñadìhí te ñá díú ñàdihí-güedé cúŷ-yu, te ni cuè ñáyi òhí cãháⁿ ndihi tée te ñá díú yí-yu cùu-güedé, te ni cuè tée cãháⁿ ndihi tnàha tée-xi, ¹⁰te ni cuè ñáyi dùhu, te ni cuè ñáyi xìho sá ndécú ndihi tnaha ñáyi-xi, te ni cuè ñáyi quihu, te ni cuè ñáyi cãháⁿ úhú, te ni cuè ñáyi dànícüehé tnàha ñáyi-xi te dùhu ñahá-yu, te ni ìⁿ cue ñáyi duha xiquide vá ndúú tãhũ-yu cundecú-yu núú ndécú Yã Ndiöxí táxí tnùní-gá. ¹¹Te dava nchòhó ducaⁿ ñí xóo cada-ndo ni cùu, te vitna ní cuu-ndo ñáyi sa ní nduu ndoo ní nduu nine ìní-xi, te ní cuu-ndo ñáyi cùu cuendá Yã Ndiöxí, te ní cuu tucu-ndo ñáyi ñá túú-gã cuéchi-xi ndècu núú-gã. Te ducaⁿ ñí quide ñaha Yã Ndiöxí xii-ndo sã vãha sá cuendá Xítohó Jesucrístú, te ní ngúndecu ndihi-ndo Espíritú Yã Ndiöxí.

Nàcuáa ndùu cuendá yiqui cùñú-ó

¹²Te cãchí ñáyi sá ncháá sã sání ìní-ó cuu cada-o, te ndáá cãháⁿ-yu òcò-ni sá ñá ncháá cùu-xi sá vãha sá cúú-xí-ó. Te núu cuení nchaa sá sání ìní-ó-ãⁿ taxi tnùní ñahá-xí te vá cáda-ó. ¹³Te nchòhó sa xìní-ndó sã ncháá sã xéxí-ó cuãnguee-xi xití-ó, te xití-ó ñí cuáha tnàhí-xi sá cúhúⁿ nchaa sá cáxí-ó, dico xití-ó ndihi nchaa sá xéxí-ó chi naa-xi. Te Xítohó Jesucrístú néhé cuendá-gá yiqui cùñú-ó, te ducaⁿ yiqui cuñú-ó cùu-xi cuendá-gá, te ñá túú ní cuãha yiqui cùñú-ó sã cùndècu-xi ichi díí ìní. ¹⁴Te dàtná ní quide Yã Ndiöxí ní dándótó-gã Xítohó Jesucrístú ducaⁿ càda ñaha-gá xii nchoo tucu chi dandòto ñaha-gá xii-o ñu na cùú-ó, chi ndàcu-gá quidé-gã nchaa sá vãha.

¹⁵Te nchòhó sa nàha-ndo sá yiqui cuñú-ó cùu-xi cuendá Xítohó Jesucrístú chi ìⁿ-ni cùu-o ndihi-gá, núu xíãⁿ ñá túú tnàhí ndùu váha-xi cáháⁿ ndihi-o ñáyi ndècu ichi díí ìní, chi yiqui cùñú-ó cùu-xi cuendá Xítohó Jesucrístú, te núu ducaⁿ na càda-o te cada ìní-ó sã cuendá-ñá ñáyi-áⁿ cúú yiqui cuñú-ó, núu xíãⁿ ñá túú tnàhí ndùu váha-xi ducaⁿ càda-o. ¹⁶Te sa xìní-ndó sã ñu ìⁿ tée na cãháⁿ ndihi-dé ìⁿ ñadìhí ndécú ìchi díí ìní te cada ìní-ó sã ìⁿ-ñá yiqui cùñú cúŷ-yu. Te ducaⁿ cãháⁿ-xi núú tütú Yã Ndiöxí núú cãchí-xi: “Ìⁿ tée na cãháⁿ ndihi-dé ìⁿ ñadìhí te ìⁿ-ñá yiqui cùñú cúŷ-yu”, duha cãchí-xi. ¹⁷Te ducaⁿ sãtnahá-xi cùu nchaa ñáyi tnàhá tnúhu ndihi Xítohó Jesucrístú, chi ìⁿ-ñá cúŷ-yu ndihi-gá.

¹⁸Te núu xíãⁿ cãháⁿ-í dóho-ndo sã vã cùndècu-ndo ichi díí ìní, chi núu ducaⁿ na càda-ndo te ñá túú tnàhí sá vãha cùu-xi sá cúú-xí yiqui cuñú-ndó

chi ío dàcuíta nihnu-xi yiqui cùñú-ndó. Te nchaa dava-gá sá cuèhé sá dúhá ñà túú quide-xi yiqui cuñú-ndó dàtná quidé xǎⁿ. **19**Te nchòhó sa cùtnuní iní-ndó sǎ yiqui cuñú-ndó cùu-xi datná ìⁿ vehe núú ndécú Espíritú Yǎ Ndiǒxí. Te ducaⁿ sǎtnahá-xi cùu yiqui cuñú-ndó chi ndècu-ndo ndìhi Espíritú-gá. Te mee-gǎ ní taxi-gá Espíritú-gá ndécú ndìhi-ndo, te ñá díú mèe-ndo cuu cuendá-ndó mèe-ndo chi Yá Ndiǒxí cúú cuendá ñáhá-gǎ xii-ndo. **20**Te ducaⁿ cùu-ndo ñáyiú cùu cuendá Yǎ Ndiǒxí chi Xítóhó Jesucristú ní nacháhu-gá nchaa yícá cuèchi-ndo. Te núu xǎⁿ xíní ñùhu-xi sá ñìhí ní ndúú-ndó càda-ndo nacuáa cuu càhnu Yá Ndiǒxí, te ducaⁿ tàú-xi cada-ndo chi espíritú-ndó ndìhi yiqui cuñú-ndó cùu-xi cuendá-gá.

Sáhú sǎ cúú-xí ñáyiú ní tnándaha

7 **1**Te ní quexìo tutú sá ñí dáquixí-ndó ndàha-í, te vitna na càchí tnúhu-í xii-ndo cuendá tnúhu càháⁿ-ndó núú tütú-ndó. Te váha cada-xi te núu vá cándèca téè ñadìhí, te ducaⁿ-ni vǎha cada-xi te núu ñáyiú dìhí vá cándècá-yu téè. **2**Te dícó-ni sá ñùu ducaⁿ na càda-ndo te dava-ndo càni iní-ndó cùndecu-ndo ichi díí iní. Núu xǎⁿ xíní ñùhu-xi sá ncháá cuè téè ndi dííⁿ cùndecu ñadìhí-güedé, te ducaⁿ-ni tucu nchaa cue ñáyiú dìhí ndi dííⁿ cùndecu yíí-yu. **3**Te càchí tnúhu-í xii-ndo sǎ ncháá cuè téè vá cúú càchí-güedé sá vǎ cúú càháⁿ ndìhi-güedé ñadìhí-güedé, te diu-ni ducaⁿ cuè ñáyiú dìhí tucu, vá cúú càchí-yu sá vǎ cúú càháⁿ ndìhí-yu yíí-yu. **4**Te nchaa cue ñáyiú dìhí chi ñá díú mèe-ní-yu cùu cuendá-yu yiqui cùñú-yu chi tnàhá cúú cuendá yíí-yu, te ducaⁿ-ni nchàa cue téè tucu chi ñá díú-ní mèe-güedé cúú cuendá-güedé yiqui cùñú-güedé chi tnàhá cúú cuendá cue ñadìhí-güedé. **5**Te cue téè vá cúú càchí-güedé sá vǎ cúú càháⁿ ndìhi-güedé ñadìhí-güedé. Te ni cuè ñáyiú dìhí vá cúú càchí-yu sá vǎ cúú càháⁿ ndìhí-yu yíí-yu. Àdi te núu ní ndatnúhu-yu sá vǎ dúcáⁿ càdá-yu ìⁿ ùú nduu cuendá sá cuìní-yu ío cáháⁿ ndìhí-yu Yá Ndiǒxí, dico nà yáha núu ná dahanuu ducaⁿ ñí ndatnúhu-yu sá vǎ dúcáⁿ càdá-yu te naníhí tnàhá tucú-yu, chi núu ñáhá te cudana te vá cuacàhnu iní-yu te sácuíhná dacàháⁿ ñáhá-xí xíí-yu cadá-yu sá ñà túú tàú-yu cadá-yu.

6Te tnúhu càháⁿ-í-a quèe-xi sá tèè ndìhi ñadìhí cuu candeca tnàhá-yu dico ñá túú quide yica-í sá dúcáⁿ càdá-yu. **7**Te yúhú sání iní-í sá ñùu dícó sá cúú te nchaa-ndo cùndecu-ndo datná ndécú-í, dico ñáhá chi mee Yǎ Ndiǒxí ní cachí-gá nàcuáa nduu táhú-ó ìⁿ ìⁿ-o cundecu-o, chi dava-o ñí cutáhú-ó núú-gǎ sá cúndècu ñadìhí-ó te dava-o ñáhá. **8**Te càchí tnúhu-í xii nchòhó cue téè vátá ñìhí-gá ñadìhí-xi sá vǎha-gá sá ñùu vá cúndècu ñadìhí-ndó dàtná yúhú. Te ducaⁿ-ni nchòhó cue ñáyiú dìhí ñáyiú vátá ñìhí-gá yíí-xi sá vǎha-gá sá ñùu vá cúndècu yíí-ndo. Te diu-ni duha càháⁿ-í sá cúú-xí nchàa nchòhó ñáyiú dìhí ní quendóo quèé sá vǎha-gá sá ñùu vá

cándeca-gá-ndó tõe. ⁹Te cächí tnúhu-í xii nchaa-ndo sã nõu xito-ndo sá vã cündèe iní-ndó cündecu mee-ndo te váha-gá sá nõu tnándaha-ndo, te ñá díú sã méé-ní cànì cuehé canì duha iní-ndó cündecu-ndo.

¹⁰Te nchaa nchòhó ñáyiù sa ní tnándaha cãháⁿ-í dóho-ndo, te ñá díú mèe-í duha cãhu iní-í cãháⁿ-í dóho-ndo chi Xítóhó Jesucrìstú ducaⁿ dàcahu iní ñáhã-gã xii-í, chi mee-gã cuiní-gã cada-ndo nàcuáa na cãháⁿ-í-a. Te nchaa nchòhó cue ñáyiù ðìhí cãháⁿ-í dóho-ndo sã vã dáñã-ndó yìi-ndo.

¹¹Te núu iò dava-ndo sã ní dáñã-ndó yìi-ndo, te xini ñuhu-xi sá vã cándeca-gá-ndó tõe, chi cündecu mee-nã-ndó àdi núu ñáhã te naqueheⁿ tucu-ndo tõe ní cuu yìi-ndo. Te nchaa nchòhó cue tée ndècu ñadìhí-xi cãháⁿ-í dóho-ndo sã vã dáñã-ndó ñáyiù cùu ñadìhí-ndó.

¹²Te tnúhu na cãháⁿ-í-a cùu-xi sá ñí sani iní mèe-í te ñá díú tnúhu sá ñí cachí Xítóhó Jesucrìstú cãháⁿ-í cúú-xí. Te núu dava nchòhó cue tée ndècu ichi Xítóhó Jesucrìstú ndécã-ndó ñáyiù ðìhí ñáyiù ñá túú ndècu ichi-gã, te vã dáñã-ndõ-yu te núu cùu váha iní-yu ndèca ñáhã-yu xii-ndo. ¹³Te núu dava nchòhó cue ñáyiù ðìhí ñáyiù ndècu ichi Xítóhó Jesucrìstú ndécã-ndó cuè tée ñá túú ndècu ichi-gã te vã dáñã-ndó-güedë te núu cùu váha iní-güedé ndécã ñàha-güedé xii-ndo. ¹⁴Te núu ìiⁿ tée ñá túú sàndáá iní-dé Xítóhó Jesucrìstú te ñadìhí-dé sàndáá iní ñáhã-áⁿ xii-gã, te tée-áⁿ ñí cuu-dé ìiⁿ tée sa ní cuyatni tnahã tnúhu ndìhi ñaha xii-gã sã cuendã ñadìhí-dé. Te ducaⁿ sãtnahã-xi cùu tucu ñadìhí ñá túú sàndáá iní ñáhã xii Xítóhó Jesucrìstú te yìi-aⁿ sàndáá iní ñáhã-dë xii-gã, te ñaha-áⁿ sa ní cuyatni tnahã tnúhu-aⁿ ndìhi-gã sã cuendã yìi-aⁿ, te ðiu-ni ducaⁿ sãtnahã-xi cùu cue landú-yu chi sa ní cuyatni tnahã tnúhu-güexi ndìhi-gã. Te núu vá dúcãⁿ cùu te cue landú-yu-áⁿ ìo xica cündecu-güexi núú-gã. ¹⁵Te núu ìiⁿ tée ñá túú sàndáá iní ñáhã xii Xítóhó Jesucrìstú cuiní-dé dañã tñaha-dé ndìhi ñadìhí-dé ñaha sàndáá iní ñáhã xii Xítóhó Jesucrìstú, te ðiu-ni na càda-dé nàcuáa sàni iní-dé. Te ðiu-ni ducaⁿ tucu te núu ñadìhí ñaha ñá túú sàndáá iní ñáhã xii Xítóhó Jesucrìstú cuiní-aⁿ dañã-aⁿ tõe sàndáá iní ñáhã xii-gã, tée cùu yìi-aⁿ te ðiu-ni na càda-aⁿ nacuáa sàni iní-aⁿ. Chi tée sàndáá iní ñáhã xii Xítóhó Jesucrìstú ñá túú tàú-dé cada yica-dë ñadìhí-dé cündecu ndìhi ñaha-aⁿ xii-dé te núu ñá túú cuiní-aⁿ. Te ðiu-ni ducaⁿ ñadìhí ñaha sàndáá iní ñáhã xii-gã ñá túú tàú-aⁿ cada yica-aⁿ cündecu ndìhi ñaha yìi-aⁿ xii-aⁿ te núu ñá túú cuiní-dé cündecu ndìhi ñaha-dë xii-aⁿ, chi Yá Ndiöxí cuiní-gã sã ncháã nchò ñáyiù ndècu ichi-gã cündecu váha-o vã nãá-ó.

¹⁶Chi cue tée sàndáá iní tnúhu Xítóhó Jesucrìstú ñá túú cùtnuní iní-güedé te núu ndacu-güedé canu ichi-güedé ñadìhí-güedé ichi-gã àdi ñáhã te núu ñá túú sàndáá iní ñáhã-yu xii-gã, te ducaⁿ-ni cuè ñáyiù ðìhí sàndáá iní tnúhu Xítóhó Jesucrìstú ñá túú cùtnuní iní-yu te núu ndacú-yu canu ichí-yu yí-yu ichi-gã àdi ñáhã te núu ñá túú sàndáá iní ñáhã-güedë xii-gã.

17Te duha na càchí tnúhu-í xii-ndo, nchaa chiùⁿ ní nduu táhú-ndó nǔú Yă Ndiöxí quidé-ndó ndèé cútñàhá ní cáháⁿ ñáhá-gă xii-ndo nǐ natuha-ndo ìchi-gá te diu-ni chiùⁿ-áⁿ cada-ndo cùndecu-ndo. Te nchaa xichi núú tàcá ñáyiú dàcuaha tnúhu-gá diu-ni duha càháⁿ-í dóho-yu. 18Te nchaa cue téé ndècu seńá ñii-xi dàtná ní cachi ndíi Moisés, cue téé ní cáháⁿ Yă Ndiöxí ndécú ìchi-gá, te diu-ni ducaⁿ cùnduu-güedé cundecu-güedé, te nchaa cue téé ñá túú ndècu seńá ñii-xi ní cáháⁿ-gá cundecu ichi-gá, diu-ni ducaⁿ cùnduu-güedé cundecu-güedé vá cuăha-güedé seńá ñii-güedé. 19Te iiⁿ-ni cùu-xi cuéi na cuăha-o seńá ñii-o àdi vá cuăha-o. Te sá ïo-gá xíní ñùhu-xi cada-o xǎⁿ cúu-xí sǎ cádá-ó nchàa nacuáa cuíní Yă Ndiöxí. 20Chi xìni ñuhu-xi sá cùndècu-ni-o datná ndécú-ó cútñàhá ní cáháⁿ ñáhá Yă Ndiöxí xii-o nǐ ngúndecu-o ìchi-gá. 21Te núu cùu-ndo ñáyiú ñá túú tnàhí dàńá quee núú chíúⁿ pàtróóⁿ-xi cútñàhá ní cáháⁿ ñáhá Yă Ndiöxí xii-ndo, te ñá túú nǎ cani iní-ndó, dico núu dàńa ñaha patróóⁿ-ndó quee-ndo núú chíúⁿ-ndó te váha-ni quee-ndo nǔú chíúⁿ-ndó. 22Te sátá nǐ cáháⁿ ñáhá Xítóhó Jesucristú xii nchòhó ñáyiú ducaⁿ ñà túú tnàhí dàńá quee núú chíúⁿ pàtróóⁿ-xi-áⁿ, te ní cuu-ndo dàtná ñáyiú dàńá queé nǔú chíúⁿ pàtróóⁿ-xi sá cúu-xí-gă, te ducaⁿ chi ñá túú-gă ndécú-ndó ìchi cuehé ichi duha. Te nchòhó ñáyiú dàńá queé nǔú chíúⁿ pàtróóⁿ-xi cùu-ndo datná ñáyiú ñá túú tnàhí dàńá quee núú chíúⁿ pàtróóⁿ-xi sá cúu-xí Xítóhó Jesucristú, te ducaⁿ chi xínu cuechi-ná-ndó nǔú-gă. 23Te Yă Ndiöxí ní nduu cuendá ñáhá-gă xii-o chi Xítóhó Jesucristú ní nacháhu-gá nchaa yícá cuěchi-o sǎ ndécú nǔú Yă Ndiöxí ní cùu, te vá dàńá-ndó sǎ tnàha ñáyiú-ndo nàdatuhú iní ñáhă-yu xii-ndo vǎ cúnú cuèchi-ndo núú Xítóhó Jesucristú nàcuáa tàú-xi cunduu. 24Te núu xǎⁿ càchí tnúhu-í xii nchaa nchòhó ñáyiú ndècu ndìhi-í ichi Xítóhó Jesucristú sá cùndècu-ni-ndo datná-ni ndècu-ndo ndéé cútñàhá ní cáháⁿ ñáhá-gă xii-ndo, te diu-ni ducaⁿ cùndecu-ndo ichi-gá.

25Te càchí tnúhu tucu-í xii-ndo sǎ Xítóhó Jesucristú ñá túú càchí tnúhu-gá xii-í nǔú nása cáháⁿ-í cuendá nchaa ñáyiú vátá tnàndaha-gá. Te duha sàni iní-í cáháⁿ-í cuendá-yu, te nchòhó cuu quíndáá iní-ndó tnúhu càháⁿ-í chi Xítóhó Jesucristú chíndèe chitúu ñaha-gă xii-í. 26Te yúhú càchí-í sá sǎ cuendá nchaa tnúndòho tnúhu ndàhú ìó ñuyíú-a vitna, te váha-gá sá ncháá ñáyiú te núu nása xǐndecú-yu te ducaⁿ-ni na cùndecú-yu. 27Te nchaa cue téé ndècu ñadìhí-xi te ducaⁿ-ni na cùndecu-güedé ndìhí-yu, te nchaa cue téé ñá túú ñadìhí-xi te ducaⁿ-ni na cùnduu-güedé vá ndúcú-güedé ñadìhí-güedé. 28Dico nchaa cue téé na ndùcu ñadìhí-xi te ñá díú ñiⁿ cuéchi cùu-xi sá dúcáⁿ ná ndùcu-güedé ñadìhí-güedé, te diu-ni ducaⁿ cùu tucu cue ñáyiú dìhí te núu na ñihí-yu yíi-yu chi ñá díú ñiⁿ cuéchi cùu-xi sá dúcáⁿ ñihí-yu yíi-yu. Te núu cue téé na ñihí-güedé ñadìhí-güedé te nándi

ndohó-yu cundecú-yu ñuyíú-a, te núu xíáⁿ duha càháⁿ-í cuendá sá vǎ ndúcú-güedě ñadihí-güedé cuendá sá vǎ ndóhǒ-yu.

29Te nchaa nchòhó ñáyiú ndècu ndihí-í ichi Xítóhó Jesucristú na càchí tnúhu-í xii-ndo sǎ ñǎ túú-gǎ vǎi nduu cumání te quixi tucu Xítóhó Jesucristú, núu xíáⁿ xíní ñùhu-xi sá ndèe vitna ngúíta nchaa cue tée ndècu ñadihí-xi cada-güedé chiúⁿ Xítóhó Jesucristú, te cada-güedé dàtná sá ñǎ túú ñadihí-güedé. **30**Te nchaa ñáyiú ndihú iní-xi te na càda-ní-yu sá ñǎ túú ndihú iní-yu cadá-yu chiúⁿ Yá Ndiöxí. Te nchaa ñáyiú cùdǐí iní-xi te na càda-ní-yu sá ñǎ túú cùdǐí iní-yu cadá-yu chiúⁿ-gá, te nchaa ñáyiú ndècu ndihí nándi sá ndécú ndihí te na càda-ní-yu sá ñǎ túú ñǎ ndécú ndihí-yu cadá-yu chiúⁿ-gá. **31**Te nchaa ñáyiú nèhe chiuⁿ nchaa sá ió ñuyíú-a te na càda-ní-yu cuendá sá ñǎ túú ñǎ néhé chiúⁿ-yu cadá-yu chiúⁿ Yá Ndiöxí, chi nchaa sá ió ñuyíú-a sa ñùhu-xi ichi cuáháⁿ-xi núú ndǐhí ñihnu-xi.

32Te cuíní-í sá vǎ cúhúⁿ iní-ndó nándi sá ió ñuyíú-a, te ni ñǎ túú tnàhí ná cani iní-ndó cùndecu-ndo, chi nchaa cue tée ndècu ichi Xítóhó Jesucristú xǐndecu mee ío ñùhu iní-güedé cada-güedé chiúⁿ-gá nàcuáa cudǐu-güedé núú-gǎ. **33**Te nchaa cue tée sa ndècu ñadihí-xi cue tée ndècu ichi-gá ñùhu iní-güedé nàcuáa cada-güedé cundecu-güedé ñuyíú-a cuendá ducaⁿ cùdǐu-güedé núú ñadihí-güedé. **34**Te diu-ni ducaⁿ cùu tucu cue ñáyiú dǐhí chi ñǎ túú ñǐⁿ-ni cuu ñáyiú sa ndècu yǐi-xi ndihí ñáyiú vátá cùndecu-gá yǐi-xi, chi ñáyiú ndècu ichi Xítóhó Jesucristú ñǎ túú ndèca tée ío ñùhu iní-yu cadá-yu chiúⁿ-gá nàcuáa ñihí ní ndúǔ-yu cundecu yǐñùhú-yu núú Yá Ndiöxí, dico cue ñáyiú dǐhí ndécá tée ndècu ichi-gá ío ñùhu iní-yu nàcuáa cundecú-yu ñuyíú-a cuendá cudǐú-yu núú yǐ-yu.

35Te duha càháⁿ-í cuendá cúú-xí ñǐⁿ sá vǎha xii-ndo, te cudǐu núú tnáhá-ndó, te cuu-ndo ñáyiú cada ndáá núú Xítóhó Jesucristú, te mee-ni-gǎ cuhuⁿ iní-ndó. Te ñǎ dǐú sǎ dúhá càháⁿ-í te quǐde yica-í sá cadá-ndó nàcuáa càháⁿ-í.

36Te núu ió dava-ndo sàni iní-ndó sǎ ñǎ túú ndùu váha-xi sá ío cuu sacuéhé dǐhe yoco-ndo cùndecú-yu ñǎ, te núu sàni iní-ndó sǎ vǎha-gá candecá-yu tée te cada-ndo nàcuáa sàni iní-ndó, chi ñǎ dǐú ñǐⁿ cuéchi cùu-xi. **37**Te núu dava-ndo ndècu déhe yoco-ndo, te vá yǒo ñǐⁿ cada yica ñàha xii-ndo sá cándecá-yu tée. Te núu mee-ndo sàni váha iní-ndó nàcuáa cada-ndo, te núu vá dásáⁿ-ndó dǐhe yoco-ndo càndeca ñàha tée te quǐde váha-ndo sǎ dúcáⁿ quǐde-ndo. **38**Te nchaa ñáyiú dàsaⁿ déhe yoco-xi càndeca ñàha tée te váha-ni quǐdé-yu, te nchaa ñáyiú ñǎ túú dàsaⁿ déhe yoco-xi càndeca ñàha tée te váha-gá tucu quǐdé-yu sá dúcáⁿ quǐdé-yu.

39Te nchaa ñáyiú dǐhí ndécú yǐi-xi xini ñùhu-xi sá cùndecu-ní-yu ndihí yǐí-yu nini ndècu vívú-güedě chi ducaⁿ càháⁿ tnúhu sá dánèhé ñáhá xii-o nacuéa cada-o cùndecu-o, dico núu na cùú-güedé te cuu naquehéⁿ-yu ñngá

tée candecá-yu dícó-ni sá ñu-ni tée ndècu ichi Xítohó Jesucristú. ⁴⁰Te yúhú sání iní-í sá ño-gá váha cundecú-yu te núu vá nánducú-yu ingá tée candecá-yu, te duha cãháⁿ-í chi Espíritú Yă Ndiöxí ducaⁿ ñacahu iní ñáhá-xí xì-í cãháⁿ-í.

Cuendá nchaa sá nchító-ó sãñaha ñăyiu ndùu táhú nchaa sá cãchí-yu cùu ndióxí

8 ¹Te vitna na cãháⁿ-í cuendá nchaa sá nchító-ó sãñaha ñăyiu ndùu táhú nchaa sá cãchí-yu cùu ndióxí te ñá ndàá chi dícó ndaha cue tee ñuyú-a ní cuáha nchaa xíãⁿ. Te nchoo sa cùtnuní váha iní-ó cuendá nchaa xíãⁿ, dícó-ni sá cuendá nchaa sá cùtnuní váha iní-ó xíãⁿ quidé cãhnu-o mee-o, dico núu cùu iní-ó tñaha ñăyiu-o te canu ichi-ö-yu ichi váha. ²Te núu dava-ndo sání iní-ndó sã túha-ndo dico cùu-ndo ñăyiu vátá cútúha-gá nàcuáa tàú-xi cunduu. ³Te núu nchòhó cúu iní-ndó Yă Ndiöxí te mee-gã cãháⁿ-gá sá cúu-ndó ñăyiu cùu cuendá-gá.

⁴Te vitna na cãchí tñuhu-í xii-ndo nàcuáa ndùu cuendá nchaa sá nchító-ó sãñaha ñăyiu ndùu táhú nchaa sá cãchí-yu cùu ndióxí te ñá ndàá chi dícó ndaha cue tée ñuyú-a ní cuáha nchaa xíãⁿ. Te nchoo cùtnuní iní-ó sã ncháá sã cãchí ñăyiu cùu ndióxí cãdúha-yu ñuyú-a ñá túú cùu-xi ndióxí, chi ñⁿdii díi-ni Yă Ndiöxí ndécú. ⁵Te cue ñăyiu ñuyú-a cãchí-yu sá cuèi andiu te cuèi ñuyú-a ndècu titní ndiöxí. Te ndáá sá ndëni ní cuu ndècu espíritú sá cãchí ñăyiu cùu ndióxí te ñá ndàá sá ndiöxí cúu-xí, te nchaa xíãⁿ táxi tñuní ñáhá-xí xì-yu. ⁶Te nchoo cùtnuní ndáá iní-ó sã ñⁿdii díi-ni Yă Ndiöxí ndécú te ñu-gá cúu-gã Tãtá-ó, te nchoo cùu-o ñăyiu cùu cuendá-gá. Te ñu-ni mee-gã ní táuchíúⁿ-gã ní cuáha nchaa sá ño ñuyú-a, te cùtnuní tucu iní-ó sã ñⁿdii díi-ni Xítohó Jesucristú ndécú, te Yaa-áⁿ ñi quide-gá nchaa chiúⁿ ní táhú Dütú Ndiöxí ní cadúha-gá nchaandi túhú sá ño ñuyú. Te ñu-ni mee Xítohó Jesucristú quidé ndècu-o ichi-gá vitna.

⁷Te ñá ncháá nchòhó ñăyiu ndècu ichi Xítohó Jesucristú cùtnuní iní-ndó nàcuáa ndùu tñuhu cãháⁿ-í. Chi sa ní cãaⁿ-ndo quide cãhnu-ndo nchaa sá cãchí-yu cùu ndióxí ní cùu. Te cuendá xíãⁿ ñu nàqueheⁿ-ni-ndo nchaa sá nchító-ó ndùu táhú nchaa sá cãchí-yu cùu ndióxí-áⁿ xéxi-ndó, te sání-ni iní-ndó sã quidé cãhnu-ndo nchaa sá cãchí-yu cùu ndióxí-áⁿ te ñá ndàá sá ndiöxí cúu-xí. Te núu sání iní-ndó sã ñá túú váha caxi-ndo sã dúcáⁿ ndùu táhú-xi-áⁿ te xèxi-ndo te xíãⁿ ñá túú cùu váha iní-ndó cuendá sá dúcáⁿ quide-ndo. ⁸Te ñá díú nchàa sá xéxi-ó quide-xi cudiu-o núu Yă Ndiöxí, chi ñⁿ-ni quide-xi cuèi na cãxi-o àdi vá cãxí-ó chi ni ñⁿ sá cãxí-ó vã chíndèe ñaha-xi cudiu-o núu Yă Ndiöxí. Te cuèi vá cãxí-ó dico ñá díú xíãⁿ cada sá vã cúdu-o núu-gã. ⁹Te cuu-ni caxi-ndo nchàa nání nihí-ndó. Te dícó-ni sá càda cuendá-ndó sã ñá díú cuendá sá xéxi-ndó-ãⁿ cuíta nihnu dava ñăyiu

ndècu ndihi-ndo ichi Xítoho Jesucrístú cadá-yu nándi sá cadă-yu nàcuáa vá cúú vâha iní Yă Ndiöxí chi ñáyiu-áⁿ ñà túú cùtnuní iní-yu. ¹⁰Te nchòhó ñáyiu xìní váha cuendá nchaa sá càchí-yu cùu ndiöxí, te núu na quihíⁿ-ndó nñú ndécú nchàa xíáⁿ te ngóo-ndo càxi-ndo nchaa sá ñí cutáhú-xi, te quiní ñáyiu ndècu ndihi-ndo ichi Xítoho Jesucrístú, ñáyiu vátá cùtnuní-gá iní-xi nàcuáa ndùu cuendá nchaa sá dúcáⁿ càchí-yu cùu ndiöxí-áⁿ, te cuèi sàni iní-yu sá ñà túú quide váha-ndo sã dúcáⁿ quide-ndo te cudana te cada yicá-yu caxí-yu tnahá-yu nchaa sá dúcáⁿ ñí nduu táhú nchaa sá càchí-yu cùu ndiöxí-áⁿ te ñá ndàá sá ndiöxí cúú-xí. ¹¹Te núu ducaⁿ cùtnuní iní-ndó nàcuáa ndùu cuendá nchaa xíãⁿ te ducaⁿ quide-ndo, te sá dúcáⁿ quide-ndo-áⁿ te dàcuíta nihnu-ndo dâva-gá ñáyiu ndècu ndihi-ndo ichi Xítoho Jesucrístú, ñáyiu vátá cùtnuní-gá iní-xi nàcuáa ndùu cuendá nchaa xíãⁿ, te diu cuendá tnahá ñáyiu-áⁿ ñí xíhí Xítoho Jesucrístú. ¹²Te sá dúcáⁿ quide-ndo-áⁿ cúú-xí ñíⁿ cuéchi núu Xítoho Jesucrístú, chi quide-ndo nacuaáa xínu iní-yu cadá-yu ñíⁿ sá sání iní-yu ñà túú vâha, núu xíãⁿ ñà túú quide váha-ndo sã cúú-xí-yu. ¹³Te núu yúhú cùtnuní iní-í sá sã cuendá ñíⁿ sá cáxi-í te ngóo ñíⁿ ñáyiu ndècu ndihi-í ichi Xítoho Jesucrístú cadá-yu ñíⁿ sá vâ cúú vâha iní Yă Ndiöxí, te váha-gá sá vâ cáxi-gă-í xíãⁿ cuendá sá vâ cadă-yu ñíⁿ sá vâ cúú vâha iní-gá.

Nchaa sá cúú càda cue téé ní táuchíúⁿ Xítoho Jesucrístú cáháⁿ tnúhu-gá

9 ¹Te yúhú chi cuu cada-í nchaa sá sání iní-í, chi tnahá-í ní táuchíúⁿ Xítoho Jesucrístú cáháⁿ-í tnúhu-gá núu ñáyiu. Te yúhú ní xìní núu-í Xítoho Jesucrístú Yaá cúú Xítoho-ó te nchòhó cúú-ndó ñáyiu ní sándáá iní tnúhu-gá sá càháⁿ-í te ducaⁿ chi ndècu ndihi-í-gá. ²Te ió dava ñáyiu ñà túú sándáá iní-yu sá Xítoho Jesucrístú ní táuchíúⁿ-gă cáháⁿ-í tnúhu-gá, dico nchòhó chi cùtnuní ndáá iní-ndó sã díú-gă ní tendaha ñàha-gá xii-í xicá cùu-í càháⁿ-í tnúhu-gá, te ducaⁿ chi yúhú ní cáháⁿ-í tnúhu-gá núu-ndó te ní sándáá iní-ndó-gă te xíãⁿ cùtnuní sá díú-gă ní tendaha ñàha-gá xii-í xicá cùu-í càháⁿ-í tnúhu-gá núu ñáyiu.

³Te duha ndùu tnúhu càháⁿ-í cuendá cundedóho nchaa ñáyiu sàtnuhu ñàha xii-í. ⁴Chi yúhú cuu-ni caxi-í nchaa núu sã cúú càxi-o na taxi ñáyiu. ⁵Te cuu-ni cundecu ñadìhí-í te caca ndeca-í-yu nchaa núu xicá cùu-í càháⁿ-í tnúhu Yá Ndiöxí dàtná quidé dâva-gá cue téé càháⁿ tnúhu-gá, ndihi cue téé cùu ñaní Xítoho Jesucrístú, ndihi té Pèlú. ⁶Te tnahá yúhú ndihi té Bèé cuu dañà-ndě chiúⁿ quide-ndí te cada-ndí dàtná xiquide dava-gá-güedé càháⁿ-güedé tnúhu Xítoho Jesucrístú. ⁷Te nchoo xìní-ó sã ncháá cuè sandadú dacuitíí sã ñúhú yâhu-güedé xínú cuèchi-güedé, te ñà túú dicó ducaⁿ xínu cuechi-güedé. Te ducaⁿ sãtnahá-xi cùu tucu ñáyiu xítu ñíⁿ sá xítú chi dacuitíí ñihí-yu ñíⁿ sá xítú-yu xèxi-yu, te ñà díú dicó ducaⁿ xítú-yu.

Te ducaⁿ cùu tucu cue tée cùu toli chi quìhni-güedé dícu quitì xìto-güedé xìhi-güedé te ñá túú dìcò ducaⁿ xìto-güedé-di. **8**Te vá cání ìní-ndó sǎ sǎ dúhá càháⁿ-í te càhu iní mée-í duha càháⁿ-í, chi tnúhu càháⁿ-í-a ìⁿ-ni quèe-xi ndìhi tnúhu ní cáháⁿ ndíi Moisés. **9**Chi ndíi-áⁿ ñí chídó tnùnì ndíi núú tütú ndíi nàcuáa ní xáhaⁿ Yǎ Ndiöxí xii ndíi, te cǎchí-xi: “Vá chíhí-ndó ñùnu yuhu ndicutu oré dǎnchìhí-di trìú”, duha cǎchí-xi núú tütú ndíi. Te ñá díú sǎ dúcáⁿ ñí cáháⁿ Yǎ Ndiöxí te càháⁿ-gá mee-ni cuendá ndicutu-áⁿ. **10**Chi ní cáháⁿ-gá cuendá nchoo cuè ñáyiu ndècu ichi-gá, te ndáá sá díú cuendá-ó dùcaⁿ ní cáháⁿ-gá. Te nchaa cue tée xìtu chihi tatá sàni ìní-güedé sá díú tàtá chíhí-güedě-áⁿ cuu sá cǎxí-güedě, te ñiu-ni ducaⁿ cùu tucu cue tée xicani trìú chi cǎni-güedé cuendá quee caxi-güedé. **11**Te ducaⁿ sǎtnahá-xi cùu nchúhú cue tée càháⁿ tnúhu Xítóhó Jesucrìstú, chi dǎnehé ñáhá-ndí xii-ndo cuendá nchaa sá vǎha quide ñaha Yá Ndiöxí xii-o, núu xíáⁿ dai tàú-xi sá nchòhó chindee ñàha-ndo xii-ndí ñuu ná cúú sǎ xíní ñùhu-ndí. **12**Te núu dava cue tée càháⁿ tnúhu Yá Ndiöxí chíndèe-ndo-güedé, te uuⁿ-gá ducaⁿ tàú-ndó chindee-ndo nchúhú cue tée ní sanu ichi ñaha xii-ndo ichi-gá.

Te cuèi tàú ndisa-ndo sǎ chíndèe ñaha-ndo xii-ndí dico ñá túú dùcaⁿ caháⁿ-ndí núú-ndó càda-ndo, te quide cahnu ìní-ndí cuèi nǎndí sá tá yǎha-ndí véxi. Te ducaⁿ quide-ndí cuendá sá ñà túú ñà cani ìní ñáyiu cuendá-ndí te ducaⁿ cuíta cuténuu-gá tnúhu sá càháⁿ nàcuáa naníhí tàhú-ó quíhíⁿ. **13**Te nchòhó xíní-ndó sǎ ncháá cuè tée xínu cuechi veñúhu ñiu-ni xíáⁿ ñihí-güedé xéxí-güedě, te ñiu-ni cue tée-áⁿ xínú cuèchi-güedé núú xìhí quitì ndùu táhú Yǎ Ndiöxí, te ñiu-ni xíáⁿ ñihí tucu-güedé sá xéxí-güedě.

14Te ñiu-ni ducaⁿ sǎtnahá-xi cùu nchúhú cue tée càháⁿ tnúhu sá càháⁿ nàcuáa naníhí tàhú-ó, chi Xítóhó Jesucrìstú ní cachí-gá sá díú-ní cuendá chiuⁿ quide-ndí ñihí-ndí caxi-ndí. **15**Te ñá ìⁿ ndùu cáháⁿ-í núú-ndó càda-ndo nacuáa tàú-xi cunduu sá cúú-xì-í, te vá cání ìní-ndó sǎ sǎ dúhá càháⁿ-í te ìⁿ sá xicáⁿ-í núú-ndó. ¡Chi cuèi na cùú-í sá ndóhò-í te ñá díú sǎ càháⁿ ñáyiu sá sǎ cuendá sá càháⁿ-í tnúhu Xítóhó Jesucrìstú ñihí-í xéxì-í!

16Te yúhú ñá túú quide cahnú-í mée-í sá càháⁿ-í tnúhu sá càháⁿ nàcuáa naníhí tàhú-ó, chi tàú tnàhá-í sá cáda-í chi ducaⁿ ñí cachí Yǎ Ndiöxí cada-í. ¡Te ndàhú ní cuu yúhú te núu vá càháⁿ-í tnúhu-áⁿ! **17**Te ñá túú càháⁿ-í tnúhu-gá sá cúú ìní mée-í chi mee-gǎ ní táuchíúⁿ-gǎ cáháⁿ-í tnúhu-gá. Te núu càháⁿ-í tnúhu-gá sá cúú ìní mée-í te tàú-í ñihí-í sá ndúú tǎhù-í ní cùu. **18**Dico sá sǎ ní nduu tàhù-í cúú-xí sǎ ño cùdíí ìní-í sá dìcò ducaⁿ càháⁿ-í tnúhu sá càháⁿ nàcuáa naníhí tàhú-ó. Te cuèi tàú-í queheⁿ-í sá táxí-ndó ndùu tàhù-í sá cuendá sá càháⁿ-í tnúhu Xítóhó Jesucrìstú, dico ñá túú dùcaⁿ quide-í. **19**Te sá dúcáⁿ dìcò ducaⁿ càháⁿ-í tnúhu sá càháⁿ nàcuáa naníhí tàhú-ó, xíáⁿ ni ìⁿ ñáyiu ñuyúú-a vá cúú cǎchí-yu sá táxí tnùnì

ñáhă-yu xii-í, te cuëi ducaⁿ dico mee-ĩ ní sani iní-í sá cúu-í dàtná ìⁿ tée xínu cuechi núu nchàa ñáyiú cuendá ducaⁿ cuíta cuu vaí-yu tuhá-yu ichi Xítóhó Jesucristú quíhíⁿ. **20**Te òré ñúhú tnàhí tnuú cue ñáyiú isràél te quide-í sá ìⁿ-ní cúu-í ndihí-yu cuëi ñá túú nchìcúⁿ nihnu-í tnúhu ní cáháⁿ ndíi Moisés, te ducaⁿ quide-í cuendá sá ñáyiú-áⁿ quèndáá iní-yu tnúhu càháⁿ-í te tuhá-yu ichi Xítóhó Jesucristú. **21**Te òré ñúhú tnàhí tnuú nchaa ñáyiú ñá túú nchìcúⁿ nihnu tnúhu ní cáháⁿ ndíi Moisés, te quide-ni-í sá quidè-í dàtná quidé mèe-yu cuendá quèndáá iní-yu tnúhu càháⁿ-í, te tuhá-yu ichi Xítóhó Jesucristú. Te cuëi ducaⁿ quide-í dico ñá túú dàña ndeé-í quidè-í nchaa nàcuáa cuiní Yă Ndiöxí cada-o, te ducaⁿ chi nchìcúⁿ nihnu-í quidè-í nchaa nàcuáa càháⁿ Xítóhó Jesucristú. **22**Te òré ndécù-í ndihi nchaa ñáyiú ñá túú cùtnuní váha iní-xi nàcuáa cundecu ichi Xítóhó Jesucristú, te tnàhá-í quidè-í dàtná quidè-yu cuendá sá ná tédóho-yu nchaa tnúhu càháⁿ-í te ducaⁿ cùtnuní-gá iní-yu nàcuáa cundecú-yu ichi-gá. Te nchaandi túhú ñáyiú quide-í sá ìⁿ-ni cuu-í ndihí-yu cuendá ducaⁿ ñhì-í nàcuáa cada-í te cundedóho-yu tnúhu càháⁿ-í te tnií-yu ichi Xítóhó Jesucristú te naníhí tàhú-yu. **23**Te duha quide-í cuendá sá cuíta quèndáá iní-yu tnúhu sá càháⁿ nàcuáa naníhí tàhú-ó quíhíⁿ, te ducaⁿ te tnàhá yúhú ío váha cundecu-í dàtná càháⁿ tnúhu-áⁿ.

24Te nchòhó sa xini-ndó sã ncháa cuè tée xínu quíhu màrcúhyú nchaa-güedé xínú-güedě, dico ìⁿ-ni-dé cúú tée ndàcu ngodó núu te tée-áⁿ cúú tée ñhí sá ndúú tãhú-xi, te ducaⁿ xini ñuhu-xi cada nchohó tucu chi cada-ndo nchàa nacuáa cuiní Yă Ndiöxí cada-ndo cuendá ducaⁿ ñhí-ndó sã ndúú tãhú-ndó. **25**Te nchaa cue tée xini dadìqui te váha váha quide cuendá-güedé ñuu ná cúú sã cádá tnèñu te xòcani-güedé cuendá sá ñà díú xĩaⁿ cada te cuíta-güedé òré dadìqui-güedé. Te ducaⁿ quide-güedé cuendá cuiní-güedé ñhí-güedě sá ndúú tãhú-güedě, te sá ndúú tãhú-güedě-áⁿ cúú-xi ìⁿ sá ndíhí ñihnu ñuyíú-a. Dico nchoo ndùcu ndee-o quide-o nacuáa ñhí-ó sã ndúú tãhú-ó, te xĩaⁿ cudíi-xi cundecu ndihi-o ñè caa ñi quíhíⁿ. **26**Te yúhú quidè-í dàtná quidé cuè tée xínu, chi cue tée-áⁿ xini-güedé núu quéxiò-güedé, te quide tucu-í dàtná xíquide cue tée sa ní cutúha naá, te ñá túú quide-í dàtná quidé cuè tée vitna dàcuaha naá. Te ducaⁿ chi yúhú quidè-í nchaa nàcuáa cuiní Yă Ndiöxí cunduu. **27**Te yúhú ñá túú dàña-í taxi tnùní ñáhá ñi ìⁿ sá cuèhé sá dúhá xii-í chi yòtnií-í mèe-í. Te ducaⁿ quide-í chi yúhú càháⁿ-í tnúhu Xítóhó Jesucristú núu ñáyiú, te cuiní-í sá vã cuíta sá ñi cachí Yă Ndiöxí nduu táhù-í.

Cuendá nchaa sá ñi cadúha cue tée ñuyíú-a quide cahnu ñáyiú

10 ¹Te nchòhó ñáyiú ndècu ndihi-í ichi Xítóhó Jesucristú na càchí tnúhu-í xii-ndo cuendá nchaa ñaní tnáhá-ndě ñáyiú isràél ní

xíndecu ndéé sanaha, chi vitna tnàhá nchòhó cúú-ndó dàtná cue ñaní tnàhá nchàa ñáyiu-áⁿ chi ndècu-ndo ichi-gá. Te nchaa ñáyiu-áⁿ ñí taxi ndecu Yá Ndiöxí ñíⁿ vícò ñí dánèhé ñáhá-xí xíi-yu ichi quíhíⁿ-yu, te ní quée dava ndute làmár nání Măr Tícuèhé te nchaá-yu ní yáha-yu. ²Te sá dúcáⁿ ñí cuu te nchaá-yu ñíⁿ-ná ní cuú-yu ndihi ndíi Moisés, te ní xíhi ndaha ñàha ndíi xíi-yu. ³Te nchaá-yu ní xexí-yu sá ñí sáñaha Yă Ndiöxí xíi-yu. ⁴Te ducaⁿ nchàa tucú-yu ní xihí-yu ndute sá ñí sáñaha-gă xíi-yu, ndute sá ñí quée yiqui nàha cava. Te cava-áⁿ cada iní-ó să cúú-xí dàtná Xítóhó Jesucristú te ducaⁿ chi ndihi ñaha-gă xíi-yu ichi cuáháⁿ-yu dàvá-áⁿ. ⁵Dico ío vâi-yu ñá túú ní quidè-yu nàcuáa càháⁿ Yă Ndiöxí, te xíăⁿ ñá túú ní cùu váha iní ñáhá-gă xíi-yu. Te sá dúcáⁿ ñí quidè-yu núu xíăⁿ òré ñúhũ-yu ichi cuáháⁿ-yu xití yucu ío vâi-yu ní xíhí.

⁶Te ducaⁿ ñí cuu cuendá nchoo vă cánchezíⁿ nihnu-o càda-o nacuáa ní quidè-yu, chi ñáyiu-áⁿ mee-ni nchàa sá cuèhé sá dúhá ñí sani iní-yu ní quidè-yu. Te nchoo xìni ñuhu-xi sá vă dúcáⁿ càda-o. ⁷Te yúhú càháⁿ-í dóho-ndo să vă quèndáá iní-ndó te ni vă cáda càhnu-ndo ni ñíⁿ sá càchí-yu cùu ndióxí ní cadúha cue tée ñuyíú-a dàtná ní quide cue ñaní tnàhá-ndíⁿ ní xíndecu ndéé sanaha. Chi ñáyiu-áⁿ ñí quidè-yu dàtná càháⁿ-xi núú tütú Yă Ndiöxí núú càchí-xi: “Nchaa ñáyiu ní xexí-yu ní xihí-yu ní quidè-yu vico, ní quide càhnú-yu sá càchí-yu cùu ndióxí ní cadúha-yu te ñá ndàá sá ndiöxí cúú-xí”, duha càchí-xi núú tütú-gá. ⁸Te ni vă cúndècu-ndo ichi díí iní dàtná ní quide dava ñáyiu-áⁿ, chi sá dúcáⁿ ñí quidè-yu te ní xíhí ócò úní mĩl-yu ñíⁿ-ni nduu. ⁹Te vá cání iní-ndó să sà cáhnú iní Yă Ndiöxí te nándi sá cuèhé sá dúhá càda-ndo cuendá cuení-ndó quèní-ndó nõu nása cada ñaha-gă xii-ndo, chi ñáyiu ní xíndecu ndéé sanaha-ăⁿ ducaⁿ ñí xóo cadá-yu, te ní xíhí-yu ní xexihaⁿ cõó. ¹⁰Te ni vă càháⁿ cuèhé-ndó cuendá Yă Ndiöxí, chi dava ñáyiu ní xíndecu ndéé sanaha-ăⁿ ducaⁿ ñí quidè-yu ní cáháⁿ cuèhé-yu cuendá-gá te ní quixi espíritú xínú cuèchi núú-gă ní sahani ñaha-xi xíi-yu.

¹¹Te ducaⁿ ñí cuu te ducaⁿ ñí ngúndéé núú tütú Yă Ndiöxí cuendá dacuàha-o vitna ta cuyatni nduu naa ñuyíú-a. Te nchaa tnúhu sá ñí ngódó tnùní-áⁿ càháⁿ dóho ñaha-xi xì-o cuendá sá vă cáda-ó dàtná ní quide ñáyiu-áⁿ. ¹²Te xíăⁿ nõu nchaa nchòhó ñáyiu sàni iní sá ío váha cùndáá ndécú ichi Xítóhó Jesucristú cada cuendá-ndó să dúcáⁿ-ní cùndáá-ndó nõú-gă, te vá dáná cuendá-ndó càda-ndo sá ñà túú cùu váha iní Yă Ndiöxí. ¹³Te diu-ni dàtná quidè sàcuíhná dácàháⁿ-xi iní nchaa dava-gá ñáyiu nándi quidè-yu, te diu-ni ducaⁿ quide ñaha-xi xii-ndo. Dico mee Yă Ndiöxí cúú-gă Yaá quidè ndáá chi quide-gá nchaa sá càháⁿ-gá, te ñá dáñá-gă sá sũúní cuídó sàcuíhná coto ndéé ñáhá-xí xì-ndo, chi není-ni nàcuáa cùndee iní-ndó dàña-gá ducaⁿ quide ñaha-xi xii-ndo. Te diu-ni-gá chindee ñàha-gá

xii-ndo cùndee iní-ndó vǎ cǎdá-ndó cuèi nǎndi sá ná òacahu iní ñáhá-xí xii-ndo.

14Te xǎǎⁿ nǔu cǎháⁿ-í dóho nchòhó ñáyiu ío cùu iní-í sá vǎ quìndǎá iní-ndó nì ìⁿ sá cǎchí-yu cùu ndiòxí te ñǎ ndǎá chi òicó ndaha cue téé ñuyíú-a ní cuáha nchaa xǎǎⁿ, te ni vǎ cǎdá cǎhnu-ndo. 15Te duha cǎháⁿ-í chi cùu-ndo ñáyiu tècú tnùnì, te mee-ndo ìo váha cuáha-ndo cuèndǎ te núu váha-ni cǎháⁿ-í àdi ñǎ túú vǎha-ni. 16Te nchoo ndàcǎⁿ táhú-ó nǔú Yǎ Ndiòxí cuèndǎ ndudí ndéhé yoho yàha stilé sá xíhí-ó, te sá dúcǎⁿ xíhí-ó ndùdí ndéhé yoho yàha stilé-áⁿ, te xǎǎⁿ ndácú ìní-ó sǎ ìⁿ-ní cùu-o ndìhi Xítóhó Jesucristú cuèndǎ sá ñǎ sati níñí-gǎ ní xíhí-gǎ núu cùrúxí, te òiu-ni ducaⁿ sǎtnahá tucu-xi cùu paá sá xéxí-ó òré xíhí-ó ndùdí ndéhé yoho yàha stilé-áⁿ, chi sá dúcǎⁿ xèxi-o paá-áⁿ xǎǎⁿ ndácú ìní-ó sǎ ìⁿ-ní cùu-o ndìhi Xítóhó Jesucristú sá cuèndǎ yiqui cùñú-gǎ. 17Te cuèi vǎi vihi-o dico ìⁿdi-ni paá xéxí-ó, te sá dúcǎⁿ ìⁿdi-ni paá xéxí-ó xǎǎⁿ ndácú ìní-ó sǎ ìⁿ-ní cùu-o ndìhi Xítóhó Jesucristú.

18Te cada cuèndǎ-ndó nǎcuáa quide ñáyiu isrǎél, chi ñáyiu-áⁿ xéxí-yu sá ndúú tǎhú Yǎ Ndiòxí. Te sá dúcǎⁿ quide-yu-áⁿ cútnùnì iní-ó sǎ tnàhá tnúhu-yu ndìhi-gǎ. 19Te vá cǎní ìní-ndó sǎ sǎ dúhá cǎháⁿ-í te cachí-ndó sǎ cùnuu nchaa sá cǎchí-yu cùu ndiòxí ní cadúha cue téé ñuyíú-a chi ñǎ túú nǎ cúú nì ìⁿ nchaa xǎǎⁿ. Te òiu-ni ducaⁿ cùu tucu nchaa sá sǎñaha ñáyiu ndùu táhú-xi chi ñǎ túú cùnuu-xi, chi ìⁿ-ni cùu-xi ndìhi nchaa dava-gǎ sá xéxí-ó. 20Te yúhú cǎchí-í sá sǎ dúcǎⁿ quide nchaa ñáyiu ñǎ túú tnàhá tnúhu ndìhi Yǎ Ndiòxí, te òicó nchaa espíritú cúndìhi yucu ñávǎha sǎñàhá-yu sá ndúú tǎhú-xi sá dúcǎⁿ quide-yu. Te ñǎ díú Yǎ Ndiòxí sǎñàhá-yu sá ndúú tǎhú-gǎ. Te yúhú cuìní-í sá vǎ tnàhá tnúhu-ndo ndìhi cue espíritú cúndìhi yucu ñávǎha. 21Te ducaⁿ chi vá cúú tnàhá tnúhu-o ndìhi cue espíritú cúndìhi yucu ñávǎha te tnàhá tnúhu-o ndìhi Xítóhó Jesucristú, te ñǎ túú ndùu váha-xi ngóo cǎxi-o coho-o sá ndúú tǎhú cue espíritú cúndìhi yucu ñávǎha-áⁿ, te ngóo cǎda-o nacuáa ní dǎndóo tnúhu Xítóhó Jesucristú coho-o ndùdí ndéhé yoho yàha stilé, te caxi-o pǎá cada-o sǎ ndácú ìní-ó sǎ ñǎ xíhí-gǎ núu cùrúxí. 22Te vá cǎní ìní-ó dùcaⁿ cada-o cuèndǎ sá vǎ cúdèéⁿ Yǎ Ndiòxí, chi ñǎ túú nǎ cǎhnu cuu-o núu cada-o nǎni véxi iní méé-ó, chi mee-gǎ ío cǎhnu cuu-gǎ.

Cada-o nchàa nacuáa cuu cǎhnu Yǎ Ndiòxí

23Te ndǎá sá ncháá sǎ cuìní-ó cǎda-o te cuu cada-o dico ñǎ ncháá cùu-xi sá vǎha sá cúú-xí-ó, te ni ñǎ ncháá-xí chìndee ñaha-xi nacuáa níhí ndéé-gǎ-ó cùndecu-o ichi Xítóhó Jesucristú. 24Te xìni ñuhu-xi sá cǎdá-ó sǎ vǎha sá cúú-xí tnàha ñáyiu-o te ñǎ díú mèe-ni sá cúú-xí mèe-o cada-o.

25Te nchòhó cuu caxi-ndo nchàa cuñú sá cùyăhu cuñú sá xìní caxi-ndo, te vá ndúcú tnũhu-ndo te núu cùu-xi cuñú sá nĩ nduu táhú sã cächí-yu cùu ndióxí. Te ñá túú nã cani iní-ndó caxi-ndo, 26chi ñuyíú-a ndihi nchaa sá ìó cúú-xí cuèndá Yă Ndiöxí.

27Te núu ìíⁿ ñáyiu ñá túú ndècu ichi Xítóhó Jesucrìstú cãháⁿ ñáhă-yu xii-ndo quíhíⁿ-ndó caxi-ndo dítá vehé-yu, te núu sàni iní-ndó sã quíhíⁿ-ndó te cuu quíhíⁿ-ndó te caxi-ndo cuèi náí cùu sá táxí-yu dico vá cãcãⁿ tnúhú-ndó nũy-yu núu ndèé ní nĩhí-yu, te ducaⁿ te cuu váha iní-ndó caxi-ndo. 28Te núu ìíⁿ ñáyiu cächí-yu sá xǎⁿ cúú-xí sã nĩ nduu táhú sã cächí-yu cùu ndióxí te vá cãxí-ndó cuèndá sá ñáyiu ducaⁿ cãháⁿ-áⁿ cuu váha iní-yu te ñá túú tnàhí ná cani iní-yu. 29Te yúhú cãháⁿ-í cuèndá nàcuáa sàni iní mée ñáyiu ducaⁿ cãháⁿ-áⁿ te ñá dǐú sã nàcuáa sàni iní mée-ndó quide-ndo.

Te dava-ndo cächí-ndó: “Cuu-ni cada-o nchàa nàcuáa sàni iní mée-ó cuèi dava-gá ñáyiu sàni iní-yu sá ñà túú ndùu váha-xi sá dúcãⁿ càda-o”, duha cächí-ndó. 30Te cächí tucu-ndo: “Ñá túú tàú-xi cãháⁿ cuèhé ñáyiu cuèndá-ó sã cuèndá nchaa sá xéxí-ó chi ndàcãⁿ táhú-ó nũú Yă Ndiöxí òré xéxí-ó”, duha cächí-ndó. 31Te cuèi nándi sá xìní caxi-ndo nihí-ndó xèxi-ndo àdi quide-ndo, te cada-ndo nàcuáa cãháⁿ váha ñáyiu cuèndá Yă Ndiöxí. 32Te vá cadã-ndó sã ñà túú tàú-ndó càda-ndo cuèndá sá vã cadã ñáyiu ìíⁿ sá ñà túú cùu váha iní Yă Ndiöxí. Te ni sã cúú-xí cuè ñáyiu isrâél, te ni sã cúú-xí cuè ñáyiu ñá túú cùu ñáyiu isrâél, te ni sã cúú-xí cuè ñáyiu ndècu ichi-gã vá dúcãⁿ càda-ndo sá cúú-xí-yu. 33Te yúhú ío ndùcu ndee-í quidè-í nàcuáa cudù-í núú nchàa ñáyiu, te quide-í sá vãha sá cúú-xí-yu, te ñá túú quide-í mee-ni sã cúú-xí mée-í. Te ducaⁿ quide-í cuèndá quíndáá iní-yu tnúhu Xítóhó Jesucrìstú te naníhí tàhú-yu.

11 1Te chí cãchìcúⁿ nihnu cada-ndo nchàa nàcuáa quide-í nchìcúⁿ nihnu-í nchaa nàcuáa quide Xítóhó Jesucrìstú.

Nàcuáa tàú-xi cada nchaa ñáyiu dǐhí núú tàcã-yu dàcuahã-yu tnúhu Yă Ndiöxí

2Te nchòhó ñáyiu ndècu ndihi-í ichi Xítóhó Jesucrìstú cächí tnúhu-í xii-ndo sã ìo cùdǐí ìní-í, chi ndàcu iní ñáhã-ndó xii-í, te quide-ndo nchaa nàcuáa ní dánèhé ñáhã-í xii-ndo. 3Te cuìní-í sá nchòhó cutnùní iní-ndó sã ìíⁿdii-ni Yă Ndiöxí cúú-gã Yaá cúnùu taxi tnuní ñáhã xii Xítóhó Jesucrìstú, te ducaⁿ Xítóhó Jesucrìstú ìíⁿdii-ni-gã cúnùu taxi tnuní-gã nchaa cue tée, te nchaa cue tée dǐu-ni mee-güedě cúnùu-güedé táxí tnùní-güedé ñadǐhí-güedé. 4Te núu nchoo cuè tée na dàdãhu-o dǐquí-ó òré cãháⁿ-ó nũú ñáyiu tnúhu sá dácãhu iní ñáhã Yă Ndiöxí xii-o àdi òré cãháⁿ ndihi-o-gã, te ìíⁿ sãcãⁿnũú cúú-xí te núu ducaⁿ na càda-o dadãhu-o dǐquí-ó. 5Dico núu

ñáyiú ðìhí vá dádáhu-yu díquĩ-yu òré càháⁿ ndìhí-yu Yá Ndiöxí, àdi oré càháⁿ-yu tnúhu sá dácàhu iní ñáhá-gă xíi-yu núú tnàhá ñáyiú-yu, te sácáⁿnúú cúú-xí te núú vá dádáhu-yu díquĩ-yu, chi ìⁿ-ni cùu-xi te núú na dèté ndìi-yu díquĩ-yu. ⁶Te núú ñá túú cuìní cue ñáyiú ðìhí dádáhu-yu díquĩ-yu te váha-gá sá ná dèté ndìi-yu díquĩ-yu. Te núú cùcahaⁿ núú-yu sá dèté díquĩ-yu te váha-gá sá ná dádáhu-yu díquĩ-yu. ⁷Te nchoo cuè téé vá cúú dádáhu-o ðíquí-ó òré càháⁿ ndìhi-o Yă Ndiöxí ni òré càháⁿ-ó tnúhu sá dácàhu iní ñáhá-gă xii-o núú ñáyiú chi díhna-gá-ó ñí cadúha ñaha Yă Ndiöxí xii-o, te ní taxi ndecu-gá nchaa sá xìní tnùní-ó dàtná ndécú nchaa sá xìní tnùní méé-gă. Te ducaⁿ ñí quide-gá chi cuìní-gá sá nchóó càda-o nacuaá cáháⁿ nchaa dava-gá ñáyiú sá ìo càhnu cuu-gá, te cue ñáyiú ðìhí quídě-yu nàcuáa cunuu nchòo cue téé. ⁸Te Yá Ndiöxí ní cadúha-gá téé, dico ñá díú yìqui naha ñadihí ní quenehe-gá ní cadúha-gá téé chi yìqui naha téé ní quenehe-gá ní cadúha-gá ñadihí. ⁹Te sá cuendá téé ducaⁿ ñí cadúha-gá ñadihí-áⁿ te ñá díú sá cuendá ñadihí ní cadúha-gá téé. ¹⁰Núú xíăⁿ tàú-xi sá ncháá ñáyiú ðìhí dádáhu-yu díquĩ-yu cuendá ducaⁿ cùtnuní sá ñà túú cùnúú-yu dàtná cùnùu nchoo cue téé. Te ducaⁿ xìní ñuhu-xi cadá-yu sá cuendá nchaa espíritú xínú cuèchi núú Yă Ndiöxí. ¹¹Te vitna nchoo ñáyiú ndècu ichi Xítóhó Jesucristú, vá càchí-ó sá cuè téé ñá túú xìní ñuhu-güedé cue ñáyiú ðìhí chindee ñàhá-yu, te ni vă càchí-ó sá cuè ñáyiú ðìhí ñá túú xìní ñuhú-yu cue téé chindee ñàha-güedé xíi-yu. ¹²Te ìⁿ yìqui naha téé ní queñuhu Yá Ndiöxí ní cadúha-gá ñadihí, dico vitna chi ñáyiú ðìhí dácàcú-yu téé. Te téé, ñadihí ní cadúha Yá Ndiöxí, te ðiu-ni ducaⁿ ñí cadúha-gá nchaa dava-gá sá ìo.

¹³Te mee-ndo càda cuendá-ndó te núú ndùu váha-xi sá vă dádáhu cue ñáyiú ðìhí díquĩ-yu òré càháⁿ ndìhí-yu Yá Ndiöxí àdi ñáhá. ¹⁴Te nchaa ñáyiú càháⁿ-yu sá ñà túú ndùu váha-xi sá cuè téé cunduu nàni idi díquí-güedě, chi ìⁿ sácáⁿnúú cúú-xí càchí-yu. ¹⁵Te nchaa ñáyiú ðìhí ñáyiú nàni idi díquí-xi càchí ñáyiú sá ìⁿ sá văha cùu-xi sá cúú-xí-yu sá dúcáⁿ nàni idi díquĩ-yu. Te ducaⁿ chi Yá Ndiöxí ní cachí-gá sá dúcáⁿ cùnúú-yu cuendá quídáhu-xi díquĩ-yu. ¹⁶Te núú ìo ñáyiú cuìní dacàá cuendú cuendá sá ñí cáháⁿ-í-a, te na cùnahá-yu sá ncháá nchúhú cue téé càháⁿ tnúhu Xítóhó Jesucristú ðiu-ni ducaⁿ sàni iní-ndí cada nchaa ñáyiú ðìhí. Te ðiu-ni ducaⁿ sàni iní nchaa ñáyiú ndècu ichi-gá.

Cuendá ñáyiú ñá túú quide datná ní quide Xítóhó Jesucristú cùtnàhá ní cudìni-gá ndìhi cue téé ní xica cuu ndìhi-gá

¹⁷Te nchòhó ñá túú quide váha-ndo ndècu-ndo núú xíăⁿ duha na càháⁿ-í dóho-ndo, chi nchòhó òré tàcá-ndó ñá túú quide váha-ndo chi ñá túú chìndee tnaha-ndo cada-ndo sá văha, chi da nàdatuhú iní tnáhá-ndó

nàcuáa ndècu-ndo. **18**Te díhna-gá na cächí tnúhu-í xii-ndo sã ñihí-í tnúhu sá òré tàcá-ndó quìde-ndo nacuáa ní cáháⁿ Xítóhó Jesucrìstú, te ñá túú cùu ìⁿnuu-ndo oré ducaⁿ quìde-ndo nacuáa ní cáháⁿ-gá. Te dava sá càháⁿ ñáyiu sàndáá iní-í te dava ñáhá. **19**Te ndáá sá dúcáⁿ tnàhí cada-xi vá cúú ìⁿnuu-ndo cuendá ducaⁿ cùtnuní nũu ndèdacàa-ndo sandáá ndisa iní-ndó tnũhu Xítóhó Jesucrìstú te ndèdacàa-ndo ñáhá! **20**Te ndi tnahá òré tàcá-ndó quìde-ndo datná ní quide Xítóhó Jesucrìstú cútnàhá ní cudìni-gá ndihí cue téé ní xica cuu ndihí-gá, te ñá túú quìde-ndo nacuáa tàú-xi cunduu chi cùtexínu-ni quìde-ndo. **21**Chi òré tàcá-ndó quìde-ndo nacuáa ní cachí Xítóhó Jesucrìstú, te dava-ndo ngödó núú-ndó díhna-gá-ndó xèxi-ndo sá néhé-ndó te ñá túú sã cùndètu tnaha-ndo, te ñá túú càháⁿ tnáhá-ndó nũu xíáⁿ dava-ndo ñà túú xèxi-ndo ndahá xití-ndó, te dava-ndo xidó-ndó quìde-ndo chi xini-ndo. **22**Te vá dúcáⁿ càda-ndo chi càa vehe-ndo núú dúcáⁿ càxi-ndo coho-ndo cada-ndo ndéé ndahá xití-ndó, chi sá dúcáⁿ quìde-ndo te dàquee tìhú-ndó nchàa dava-gá ñáyiu ndècu ndihí-ndo ichi Yá Ndiöxí, te dándóo canúú-ndó nchàa ñáyiu ndàhú sá dúcáⁿ quìde-ndo. ÌNúu xíáⁿ vá cúú cächí-í sá cúú-ndó ñáyiu quìde váha chi ñá túú quìde váha-ndo sã dúcáⁿ quìde-ndo ndecu-ndo!

Xítóhó Jesucrìstú ní dándóo tnúhu-gá sá cóhó-ó ndùdí ndéhé yoho yàha stilé te caxi-o pàá cuendá ndacu iní-ó sã ñí xihí-gá

(Mt. 26:26-29; Mr. 14:22-25; Lc. 22:14-20)

23Te dàtná-ni ní dánèhé ñáhá Xítóhó Jesucrìstú xii-í te ñiu-ni ducaⁿ ñí dánèhé ñáhà-í xii-ndo, chi ñiu-ni niú cútnàhá ní sáha cuendá ñáhá ndíi Jùdás Iscàrioté xii-gá núú cuè téé cùu úhú iní ñáhá ñí queheⁿ-gá pàá, **24**te ní ndacáⁿ táhú-gã núú Yá Ndiöxí, te ní táhú cuèchi-gá, te ní xáhaⁿ-gã xii cue téé xica cuu ndihí-gá: “Chí quéhéⁿ pàá-a caxi-ndo te cada iní-ndó sã cúú-xí dàtná yiquí cùnú-í, chi yúhú cuú-í sácuendá-ndó. Te ducaⁿ-ni càda-ndo cundecu-ndo cuendá ndacu iní ñáhá-ndó xii-í”, cächí-gá xãhaⁿ-gã xii-güedé. **25**Te sátá ñí yàha ní xexi-güedé pàá sá ñí sãñaha-gã, te ní queheⁿ-gá tàsáⁿ ñúhú ndùdí ndéhé yoho yàha stilé, te ní ndacáⁿ táhú tùcu-gá núú Yá Ndiöxí. Te ní xáhaⁿ-gã xii cue téé xica cuu ndihí-gá: “Chí cóhó ndùdí ndéhé yoho yàha stilé-a, te cada iní-ndó sã cúú-xí dàtná níñi-í, te cuendá níñi-í sá cátí òré cuú-í cutnùní ndáá sá Yá Ndiöxí cada-gá ingá núú sã vãha sá cúú-xí ñáyiu. Te ndi tnahá òré coho-ndo ndùdí ndéhé yoho yàha stilé-áⁿ te ndacu iní ñáhá-ndó xii-í, te ducaⁿ-ni càda-ndo cundecu-ndo”, cachí-gá xãhaⁿ-gã xii-güedé. **26**Te ndi tnahá òré xéxi-ndó pàá te xihí-ndo ndudí ndéhé yoho yàha stilé, te xíáⁿ dátũu-ndo nũú ñáyiu sá Xítóhó Jesucrìstú ní xihí-gá cuendá-yu, te ducaⁿ-ni càda-ndo cundecu-ndo ndéé ná sàá nduu quìxi tucu Xítóhó Jesucrìstú.

Nàcuáa cada-o òré caxi-o pàá ndihi òré coho-o ndùdí ndéhé yoho yàha stilé dātñá ní cachí Xítohá Jesucrìstú

27Te dava-ndo ñà túú quìde-ndo nacuáa cuìní Yă Ndiöxí cada-ndo òré xéxí-ndó pàá ndihi òré xíhí-ndó ndùdí ndéhé yoho yàha stilé, te sá dúcáⁿ quìde-ndo-áⁿ te cucuéchi xii-ndo chi ñá túú nèhe-ndo sá yíñùhu sá cúú-xí yìqui cuñú Xítohá Jesucrìstú, te ni ñà túú nèhe-ndo sá yíñùhu sá cúú-xí ññí-gă. 28Te ío váha cada cuèndá-ndó te núu ndècu váha iní-ndó nűú Xítohá Jesucrìstú òré cúmăní-gă caxi-ndo pàá ndihi òré cúmăní-gă coho-ndo ndùdí ndéhé yoho yàha stilé. Te núu ndècu váha iní-ndó nűú-gă te caxi-ndo te coho-ndo. 29Te dava nchòhó ñá túú sàni váha iní-ndó cuèndá yiqui cùñú Xítohá Jesucrìstú te xèxi-ndo paá te xìhi-ndo ndudí ndéhé yoho yàha stilé, te nacháhu-ndo să dúcáⁿ ñà túú sàni váha iní-ndó. 30Te diu sá dúcáⁿ quìde-ndo núu xíăⁿ vài-ndo cuhú, te ío ndàhú ndécú-ndó, te dava ñáyiú ndècu ndihi-ndo sa ní xíhí-yu. 31Dico núu ío váha sáha-o cuèndá nàcuáa ndècu-o núú Yă Ndiöxí, te vá dúcáⁿ dândoho ñaha-gá xii-o. 32Te òré ndéhé Yă Ndiöxí sá ñà túú quìde ndáá-ó ndècu-o te dândoho ñaha-gá xii-o. Te ducaⁿ quìde-gá cuèndá sá vă cuíta nihnu-o, chi núu ñáhá te cuíta nihnu-o ndihi nchaa ñáyiú ndècu ichi cuehé ichi duha.

33Te núu xíăⁿ cãháⁿ-í dóho nchaa nchòhó ñáyiú ndècu ndihi-í ichi Xítohá Jesucrìstú sá òré tacá-ndó càda-ndo nacuáa ní quide Xítohá Jesucrìstú cútnàhá ní cudìni-gá ndihi cue téé ní xica cuu ndihi-gá, te cundetú tñaha-ndo nduu nchaa-ndo te dătnùní ducaⁿ càda-ndo. 34Te núu dava-ndo xíhí-ndó dòcó te caxi duuⁿ-ndo vèhe-ndo te dătnùní natacá-ndó, cuèndá òré natacá-ndó te vá cádá-ndó ìⁿ sá ñà túú tàú-ndó càda-ndo cuendá sá vă dándòho ñaha Yă Ndiöxí xii-ndo. Te òré quixi coto ñaha-í xii-ndo te dává-áⁿ cachí tnúhu-í xii-ndo nchàa dava-gá sá cúmăní.

Nàcuáa chindee ñaha Espíritú Yă Ndiöxí cada-o ìⁿ ìⁿ-o

12 1Te nchòhó ñáyiú ndècu ndihi-í ichi Xítohá Jesucrìstú cuìní-í cachí tnúhu-í xii-ndo nàcuáa chindee ñaha Espíritú Yă Ndiöxí xii-o ìⁿ ìⁿ-o cuendá cutnùní iní-ndó.

2Te nchòhó sa nàha-ndo sá cűtnàhá vátá cűndècu-gá-ndó ìchi Xítohá Jesucrìstú ní xóo dandàhú ñáhá yùcu ñávãha xii-ndo, te ní xóo quíndáá iní-ndó nchàa sá ñí cadúha cue ñáyiú ñuyíú-a nchaa sá cãchí-yu cùu ndióxí te ñá ndàá sá ndiöxí cúú-xí, te nchaa xíăⁿ ñá túú cãháⁿ-xi. 3Te cuìní-í sá nchòhó cutnùní iní-ndó să Espíritú Yă Ndiöxí ñá túú chindee-xi ni ìⁿ ñáyiú cuèndá sá cãháⁿ úhú-yu Xítohá Jesucrìstú. Te ni ìⁿ ñáyiú ñá túú cãhu iní-yu cáháⁿ-yu sá Xítohá Jesucrìstú cúú-gă Xítohá-yu te núu ñá túú Espíritú Yă Ndiöxí dácàhu iní ñáhá-xí xíí-yu.

⁴Te ndi dííⁿ ndì dííⁿ ndùu chiuⁿ ní cachí Espíritú Yă Ndiöxí cada-o, te diu-ni ìíⁿdìi-ni Espíritú-gá ndécú. ⁵Te ndi dííⁿ ndùu chiuⁿ quide-o xinu cuechi-o núú ìíⁿdii-ni Xítóhó Jesucrìstú. ⁶Te ndi dííⁿ ndì dííⁿ chindee ñaha Yă Ndiöxí xii-o nàcuáa cada-o chiuⁿ-gá, te diu-ni ìíⁿ dìi-gá ndécú chindee-gá nchaa ñáyiu. ⁷Te Espíritú Yă Ndiöxí quidé-xí sã nchóó càda-o sá vãha, te ducaⁿ chindee-o cue ñáyiu ndècu ndihi-o ichi Xítóhó Jesucrìstú. ⁸Te dava-o ñí nduu táhú-ó núú Yă Ndiöxí sá Espíritú-gá cada te ndacu-o cãháⁿ-ó tnũhu sá ìo càhnu cuu diu-ni tnũhu mee Yă Ndiöxí, te dava tucu-o ñí nduu táhú-ó cùtnuní iní-ó nàcuáa càháⁿ tnũhu-gá te cãháⁿ-ó nàcuáa cuìní Espíritú-gá. ⁹Te dava tucu-o ñí nduu táhú-ó sã ìo quíndáá iní-ó Xítóhó Jesucrìstú cuèndá cada-gá ìíⁿ sá cuìní-ó, te ducaⁿ chi Espíritú Yă Ndiöxí chíndèe ñaha-xi xii-o. Te dava tucu-o ñí nduu táhú-ó sã càcáⁿ táhú-ní-ó núú Xítóhó Jesucrìstú cuèndá ñáyiu cùhú te ndúha-yu. ¹⁰Te dava tucu-o ñí nduu táhú-ó sã ndácú-ó càda-o nchaa sá vã yõo tnàhí ndàcu cada, te dava tucu-o ñí nduu táhú-ó núú Yă Ndiöxí sá càháⁿ-ó tnũhu sá dácàhu iní ñáhá-gã xii-o, te dava tucu-o ñí nduu táhú-ó sã cùtnuní iní-ó nõu diu Espíritú Yă Ndiöxí chíndèe ñaha-xi xii ñáyiu òré càháⁿ-yu tnũhu-gá àdi cue espíritú cùndìhi yucu ñávãha. Te dava tucu-o ñí nduu táhú-ó cãháⁿ-ó tnũhu sá dácàhu iní ñáhá Espíritú Yă Ndiöxí xii-o tnũhu sá ñà túú xìní-ó, te dava tucu-o ñí nduu táhú-ó cãháⁿ-ó nàcuáa quèe-xi nchaa tnũhu-áⁿ. ¹¹Te ìíⁿdìi díí-ni Espíritú Yă Ndiöxí ducaⁿ chindee ñaha-xi, te diu-ni Espíritú-gá dácãhũ ñaha-xi xii-o ndi dííⁿ nõú chiuⁿ sá cuìní méé-xí càda-o.

Nchaa-o ìíⁿ-ni cuu-o ndihi Xítóhó Jesucrìstú

¹²Te nchoo ñáyiu ndècu ñuyíú-a titní xichi cùu yiqui cuñú-ó dico ìíⁿ-ni cùu-xi, te diu-ni ducaⁿ sãtnahá-xi cùu-o vitna ndecu-o ichi Xítóhó Jesucrìstú chi ìíⁿ-ni cùu-o ndihi-gá. ¹³Te dava-o cùu-o ñáyiu isràèl, te dava-o ñà túú cùu-o ñáyiu isràèl, te dava-o cùu-o ñáyiu ñá túú tnàhí dàñá quee núú chíúⁿ pàtróóⁿ-xi, te dava-o cùu-o ñáyiu dàñá quee nõú chíúⁿ pàtróóⁿ-xi. Te mee Espíritú Yă Ndiöxí ní quide-xi sá ncháá-ó ìíⁿ-ná cúú-ó ndècu-o ndihi Xítóhó Jesucrìstú. Te Yă Ndiöxí ní cachí-gá sá ncháá-ó cùndecu ndihi-o Espíritú-gá.

¹⁴Te nchòhó xìní-ndó sã tìtní xichi cùu yiqui cuñú-ó te ñá díú ìíⁿ-ni xichi cuu-xi. ¹⁵Te cuèi sáhá-ó ndìhi ndaha-o ñá túú ìíⁿ-ni cuu-xi dico vá cúú càchí-ó sã sáhá-ó ñà túú cùu-xi yiqui cuñú-ó. ¹⁶Te cuèi lóho-o ndìhi tĩnuu-o ñá túú ìíⁿ-ni cuu-xi dico vá càchí-ó sã lõho-o ñà túú cùu-xi yiqui cuñú-ó. ¹⁷Te núu ñihí ní ndúú yiqui cuñú-ó ní xĩndéé mee-ni tĩnuu-o, te ñá túú ndèe cundéé lõho-o cùndedóho ni cùu te núu ducaⁿ, àdi núu ñihí yiqui cùñú-ó ní xĩndéé mee-ni lõho-o te ñá túú ndèe cundéé dítní-ó ní cùu te núu ducaⁿ. ¹⁸Dico mee Yă Ndiöxí ní taxi ndecu-gá ìíⁿ ìíⁿ xichi yiqui

cũnú-ó nàcuáa ní cachí iní méé-gă. **19**Te núu ìⁿ-ni sǎ ní xĩndecu ñihí yiqui cũnú-ó, te vá cúndũu-xi nacuáa tàú-xi cunduu ni cùu te núu ducaⁿ. **20**Dico tĩtnĩ xichi cùu yiqui cuñú-ó, te ìⁿ-ni cùu-xi ñihí-xi.

21Te sa nàha-o sǎ vǎ cúú cǎchí-ó sǎ tĩnuu-o ñǎ túú xini ñuhu-xi ndaha-o, àdi díquí-ó ñǎ túú xini ñuhu-xi sáhá-ó. **22**Te nchoo sà naha-o sǎ dává xichi yiqui cuñú-ó sǎ cǎchí-ó sǎ ñǎ túú cũnuu ío-gǎ xini ñuhu-xi. **23**Te dava xichi yiqui cũnú-ó sǎ ñǎ túú quide cuendá cǎvíhí-ó nchàa xǎⁿ sǎ quidáhu dódó sácũhnu-o, te dava xichi yiqui cũnú-ó ñǎ cúú cùtúu chi dacuití sǎ quidáhu. **24**Te nchaa xichi yiqui cũnú-ó sǎ cúú cùtúu ñǎ túú xini ñuhu-xi quidáhu. Te Yá Ndiõxí ní taxi ndecu-gǎ nchaa xichi yiqui cũnú-ó nàcuáa tàú-xi cunduu. Te ní cachí-gǎ sǎ dává-gǎ xichi yiqui cũnú-ó núú vǎ cúú cùtúu quidáhu. **25**Te ducaⁿ ñĩ quide-gǎ cuendá sǎ íⁿ-ní cùu yiqui cuñú-ó. Te ducaⁿ ndì tnahá ìⁿ ìⁿ xichi yiqui cũnú-ó chĩndee tnahá-xi. Te ducaⁿ sǎtnahá-xi cùu nchoo vitna ndecu-o ichi Xĩtohó Jesucristú chi chĩndee tnahá-o. **26**Te núu ìⁿ xichi yiqui cũnú-ó ná tnahúhú te ñihí-ó quide úhú-xi, te núu ìⁿ xichi yiqui cũnú-ó ío váha ndècu-xi te ducaⁿ ñihí yiqui cũnú-ó cúú vǎha-xi. Te ducaⁿ sǎtnahá-xi cùu-o vitna ndecu-o ichi Xĩtohó Jesucristú.

27Te nchoo ndècu ndihí-o Xĩtohó Jesucristú, te cùu-o datná yiqui cũnú-gǎ te ìⁿ ìⁿ-o cùu-o datná ìⁿ ìⁿ xichi yiqui cũnú-gǎ. **28**Te ducaⁿ sǎtnahá-xi cùu-o chi Yá Ndiõxí ní taxi-gǎ ndí díⁿ ndì díⁿ chĩuⁿ quide-o sǎ cúú-xí nchàa ñáyiu ndècu ichi-gǎ. Te díhna-gǎ cue tée caca cuu cǎháⁿ tnúhu-gǎ núú ñáyiu ní taxi ndecu-gǎ, te dǎtnùní ní taxi ndecu-gǎ cue tée cǎháⁿ tnúhu-gǎ nàcuáa dǎcahu iní ñáhá mèe-gǎ, te dǎtnùní ní taxi ndecu-gǎ cue tée dǎnehé ñáhá xii ñáyiu tnúhu-gǎ núú tàcá-yu, te dǎtnùní ní taxi ndecu tucu-gǎ cue tée ndàcu quide sǎ vǎ yõo tnahí ndàcu cada. Te ní taxi ndecu tucu-gǎ cue tée xicáⁿ táhú-ní núú Xĩtohó Jesucristú cuendá ñáyiu cùhú te ndúha-yu. Te ní taxi ndecu tucu-gǎ cue tée chĩndee cue ñáyiu ndècu ichi-gǎ. Te ní taxi ndecu tucu-gǎ cue tée yĩndaha ñaha xii ñáyiu ndècu ichi-gǎ, te ní taxi ndecu tucu-gǎ cue tée cǎháⁿ tnúhu sǎ dǎcàhu iní ñáhá Espíritú-gǎ tnúhu sǎ ñǎ túú xini-güedé. **29**Te ñǎ ncháá-ó cùu-o cue tée ní táuchíuⁿ Xĩtohó Jesucristú cǎháⁿ tnúhu-gǎ núú ñáyiu, te ñǎ ncháá-ó cùu-o cue tée cǎháⁿ tnúhu sǎ dǎcàhu iní ñáhá Yǎ Ndiõxí xii-o. Te ñǎ ncháá-ó cùu-o cue tée dǎcuaha ñaha xii-yu. Te ñǎ ncháá-ó cùu-o cue tée quide sǎ vǎ yõo tnahí ndàcu cada. **30**Te ñǎ ncháá-ó cùu-o cue tée dícó-ni cǎcáⁿ táhú núú Xĩtohó Jesucristú cuendá ñáyiu cùhú te ndúha-yu. Te ñǎ ncháá-ó cùu-o cue tée cǎháⁿ tnúhu sǎ dǎcàhu iní ñaha Espíritú Yǎ Ndiõxí tnúhu sǎ ñǎ túú xini-ó, te ñǎ ncháá-ó cùu-o cue tée cùtnuní iní-xi cǎháⁿ nàcuáa ndũu tnúhu-áⁿ. **31**Te ío nducu ndèe-ndo cada-ndo nacuáa nduu táhú-ndó núú Yǎ Ndiõxí nchaa sǎ ío-gǎ cùnũu cada-ndo. Te vitna na

dànehé ñáhá tùcu-í xii-ndo nàcuáa cada-ndo, dico sá dánèhé ñáhà-í-a ío-gá cúnùu-xi.

Cuu iní-ó tnàha ñáyiu-o

13 ¹Te núu nchoo xìní-ó cǎháⁿ-ó tnùhu sá ïo vii ío váha cuáháⁿ cǎháⁿ ñáyiu ñuyíú-a, àdi xìní-ó cǎháⁿ-ó tnùhu sá ïo vii ío váha cuáháⁿ cǎháⁿ cue espíritú xínú cuèchi núú Yǎ Ndiöxí, te núu xìní-ó cǎháⁿ-ó nchàa tnúhu-áⁿ te ñá túú cùu iní-ó cuè tnaha ñáyiu-o ña, te ñá túú nàndíhi-xi sá xìní-ó cǎháⁿ-ó tnùhu-áⁿ te cùu-o datná dava caá sá ïo dusaⁿ quìde. ²Te núu cùu-o ñáyiu cǎháⁿ tnúhu sá dácàhu iní ñáhá Yǎ Ndiöxí, àdi cuu-o ñáyiu cùtnuní iní-xi nàcuáa cuáháⁿ nchaa tnúhu ndùu yuhu ni cuu, àdi cuu-o ñáyiu ío váha cùtnuní iní-xi nchaa nàcuáa quìde Yá Ndiöxí, àdi cuu-o ñáyiu ío váha sàndáá iní ñáhá xii Yá Ndiöxí nàcuáa ndacu-o cùu-o ìⁿ yucu xocuíñí-xi núú ndécú-xí, te núu nchaa xíáⁿ xìní-ó càda-o te ñá túú cùu iní-ó cuè tnaha ñáyiu-o ña, te ñá túú vèdana nàndíhi-xi te núu vá cúú iní-ó tnàha ñáyiu-o cuèi na càda-o nchaa xíáⁿ. ³Te cuèi nchaa sá ndécú ndíhi-o na dacáhñu-o, te cuèi na cuǎha cuèndá-ó mèe-o cáyú-ó sǎ cúú-xí Yǎ Ndiöxí, dico ñá túú vèdana chìndee ñaha-xi xii-o sá dúcáⁿ càda-o te núu ñá túú cùu iní-ó cuè tnaha ñáyiu-o.

⁴Dico núu cùu iní-ó cuè tnaha ñáyiu-o, te cǎhnu iní-ó, te quìde váha-o, te ñá túú cùu-o ñáyiu cuédú iní, te ni ñà túú cǎháⁿ-ó nùu cùu cahnu-o, te ni ñà túú sàni iní-ó càda cahnu-o mee-o, ⁵te ni ñà túú ñùhu cuehé iní-ó, te ni ñà túú ndùcu-o mee-ni sá cúú-xí mèe-o, te ni ñà túú-gǎ cúdèéⁿ-ó cuèndá ìⁿ sá cúú, te ni ñà túú-gǎ sácùhuⁿ iní-ó sǎ quídé ñàha tnaha ñáyiu-o xii-o. ⁶Te ni ñà túú-gǎ cúdíí iní-ó nchàa sá ñà túú vǎha quìde ñáyiu, chi mee-nǎ cuèndá nchaa sá vǎha cùdíí iní-ó. ⁷Te nchaa sá yǎha-o sàcahnu iní-ó, te sàni váha iní-ó cuèndá nchaa ñáyiu, te sàni iní-ó sǎ díú-ní nchàa sá vǎha cuu xii nchaa tnàha ñáyiu-o ndéé cuèé-gá, te ío quìde cahnu iní-ó cuèi nàndí sá yǎha-o, te nchaa xíáⁿ quídé-ó te núu cùu iní-ó cuè tnaha ñáyiu-o.

⁸Te ni caa ni quíhíⁿ duha-ni cuu iní-ó cuè tnaha ñáyiu-o. Dico sáá nduu te vá cóó-gǎ ñáyiu cǎháⁿ tnúhu sá dácàhu iní ñáhá Yǎ Ndiöxí, te ni vǎ cóó-gǎ ñáyiu cǎháⁿ tnúhu sá dácàhu iní ñáhá Espíritú Yǎ Ndiöxí tnúhu sá ñà túú xìní-yu, te ni vǎ cóó-gǎ ñáyiu túha dàtná túha ñáyiu vitna. ⁹Te vitna ñá túú cùtnuní iní-ó nchàa nàcuáa sàni iní Yǎ Ndiöxí chi sacú-ni cùtnuní iní-ó, te ducaⁿ sàcú-ni cǎháⁿ-ó nàcuáa ndùu tnúhu-gá, dico cǎháⁿ-ó tnùhu-gá nàcuáa dàcahu iní ñáhá-gǎ xii-o. ¹⁰Te na sáá nduu càda Yá Ndiöxí nchaa nàcuáa tàú-xi cunduu, te dàvá-áⁿ te nchaa sá cǎchí-gá ñá túú ndècu-xi nàcuáa tàú-xi cunduu vá dúcáⁿ-gǎ cundecu-xi.

¹¹Te yúhú cútnàhá ní cuu landú-í ní xóo cada-í sá cùu-í landú, ní xóo cǎháⁿ-í, ní xóo caní iní-í, te ní xóo tecú tnùní-í dàtná quídé cuè landú

xĩndecu vitna, dico sátá nĩ cuu-í ìíⁿ tée cùu sacuéhé te ñá túú-gă quídè-í dàtná ní xóo cada-í cùtnàhá ní cuu landú-í. ¹²Te ducaⁿ sãtnahá-xi cùu-o vitna ndecu-o ichi Xítóhó Jesucrístú, chi ñá túú cùtnuní váha iní-ó nàcuáa cùu cuendá Yă Ndiöxí, te cùu-o datná ñáyiu ndèhe ìíⁿ núú yùtátá sã ñà túú tũu váha núú-xi, te ducaⁿ sãtnahá-xi cùu-o chi ñá túú cùtnuní váha iní-ó nãsa cùu cuendá-gă, dico sáá nduu quíní núú-ó-gă. Te nchoo sàcú-ni cùtnuní iní-ó nàcuáa ndùu-gă vitna dico na sàá nduu te quíní ndáá-ó nàcuáa càa nacuáa ndùu-gă dàtná xìní ñáhá mèe-gă xii-o. ¹³Te ñi caa ñi quíhíⁿ ducaⁿ-ni quèndáá iní-ó Yă Ndiöxí, te ducaⁿ-ni cùndecu ndihi-o tnúhu ndee ìní cundecu-o ndìhi-gă, te ducaⁿ-ni ìo cuu iní-ó-gă ndìhi tnàha ñáyiu-o. Te sá cúú ìní-ó Yă Ndiöxí ndìhi sá cúú ìní-ó tnàha ñáyiu-o xiãⁿ ío-gă cúnùu-xi dacúúxí dâva-gă.

Ñáyiu càháⁿ tnúhu sá dácàhu iní ñáhá Espíritú Yă Ndiöxí

14 ¹Te vá dáñá ndèe-ndó cùu iní-ndó tnàha ñáyiu-ndo, te cuhuⁿ iní-ndó sã ndùu táhú-ndó nũú Yă Ndiöxí tĩtní núú chiuⁿ cada-ndo nacuáa chindee ñàha Espíritú-gă xii-ndo, te ío cuhuⁿ iní-ndó sã ndúú táhú-ndó cãháⁿ-ndó tnũhu sá dácàhu iní ñáhá Yă Ndiöxí xii-ndo. ²Te cue ñáyiu càháⁿ tnúhu sá dácàhu iní ñáhá Espíritú Yă Ndiöxí tnúhu sá ñà túú xìní-yu, te tnúhu càháⁿ-yu-áⁿ cúú-xí sã cúú-xí Yă Ndiöxí te ñá díú sã cúú-xí ñáyiu chi ñá túú tècú tnùní-yu, te mee Espíritú Yă Ndiöxí quídé-xí dùcaⁿ caháⁿ-yu tnúhu yìyuhu. ³Te cue ñáyiu ní nduu táhú nũú Yă Ndiöxí cãháⁿ tnúhu sá dácàhu iní ñáhá-gă xií-yu, te ñáyiu-áⁿ dácàháⁿ-yu ñáyiu nàcuáa cuita níhí ndéé-gă-yu cundecú-yu ichi-gă, te ducaⁿ cuãñàhá-yu tnúhu ndee ìní xií-yu òré ndìhú iní-yu. ⁴Te ñáyiu càháⁿ tnúhu sá dácàhu iní ñáhá Espíritú Yă Ndiöxí xií-yu tnúhu sá ñà túú xìní-yu-áⁿ, ñáyiu-áⁿ mee-ñí-yu ñìhí ndéé-yu ndècú-yu ichi-gă. Dico ñáyiu càháⁿ tnúhu sá dácàhu iní ñáhá-gă xií-yu, càháⁿ-yu tnúhu-áⁿ nàcuáa níhí ndéé dâva-gă ñáyiu nchìcúⁿ nihnu ichi-gă.

⁵Te yúhú ío cudíí ìní-í te núu nchaa-ndo cãháⁿ-ndó tnũhu sá dácàhu iní ñáhá Espíritú Yă Ndiöxí xii-ndo tnũhu sá ñà túú xìní-ndó. Dico ío-gă cudíí ìní-í te núu nchaa-ndo cãháⁿ-ndó tnũhu sá dácàhu iní ñáhá-gă, chi ío-gă xìní ñùhu-xi sá càháⁿ-ndó tnũhu-áⁿ dácúúxí sã càháⁿ-ndó tnũhu sá dácàhu iní ñáhá Espíritú-gă cãháⁿ-ndó tnũhu sá ñà túú xìní-ndó. Dico ìíⁿ-ni nũtnahá-xi quide-ndo te núu nchòhó ñáyiu càháⁿ tnúhu sá dácàhu iní ñáhá Espíritú-gă cãháⁿ-ndó nàcuáa quèe-xi tnúhu-áⁿ. Te ducaⁿ te nchaa ñáyiu ndècu ichi Yă Ndiöxí cuita níhí ndéé-gă-yu quíhíⁿ cundecú-yu ichi-gă. ⁶Te núu yúhú quexìo-í núú ndécú nchòhó ñáyiu ndècu ndìhi-í ichi Xítóhó Jesucrístú, te ngüíta-í cãháⁿ-í mee-ni tnũhu sá dácàhu iní ñáhá Espíritú Yă Ndiöxí xii-í tnúhu sá ñà túú xìní-í, te ñá túú ñã sá vãha cuu-xi sá

cúu-xí-ndó. Dico cuu-xi sá vǎha xii-ndo te núu na cǎháⁿ-í núu-ndó nchaa tnúhu sá dánèhé ñáhá Yǎ Ndiǒxí xii-í tnúhu sá vǎtá dǎcuàha-gá-í, ndihi nchaa tnúhu sá sà xiní-í, ndihi nchaa tnúhu sá dǎcàhu iní ñáhá-gǎ xii-í cǎháⁿ-í, ndihi nchaa dava-gá tnúhu-gá.

⁷Te na cǎda-o cuendá sá núu ìⁿ tée tìú-dé vǐlu àdi cani-dé àrpá te núu ñá túú sàhnú-dé ndihi-xi ìⁿ yaá, te ñá cútnùní iní-ó nǎ yaá cání-dě àdi ná yaá tìú-dé te núu ducaⁿ na cǎda-dé. ⁸Te ñiú-ni ducaⁿ sǎtnahá-xi cùu tucu tée cùu sandadú tìú cútú, chi núu vá tìú váha-dé nàcuáa tàú-xi cunduu òré quǐhíⁿ-güedé nàá-güedé, te vá ngǔndecu túha dava-gá cue sandàdú te núu ducaⁿ na cǎda-dé vá tìú váha-dé. ⁹Te ducaⁿ sǎtnahá-xi cùu nchohó te núu vá cǎháⁿ-ndó ìⁿ tnúhu nàcuáa tàú-xi cunduu núu ñǎyiu te vá tècú tnùnì-yu tnúhu cǎháⁿ-ndó. ¡Chi àúⁿ nǎ cuu cǎháⁿ-ndó te núu ducaⁿ na cǎda-ndo! ¹⁰Te ío tìtní núu tnúhu ìó ñuyíú, te ìⁿ ìⁿ núu tnúhu-áⁿ cútnùní iní ñǎyiu nàcuáa quèe-xi. ¹¹Te núu nchoo ñǎ tècú tnùnì-ó ìⁿ tnúhu cǎháⁿ ìⁿ ñǎyiu, te quède-ó-yu ñǎyiu ñuú xícá chi ñá túú cǎháⁿ-yu tnúhu cǎháⁿ-ó, te ñiú-ni ducaⁿ quède ñahá-yu xii nchoo tùcu. ¹²Te xǎⁿ núu cǎchí tnúhu-í xii nchaa nchòhó ñǎyiu ío cuiní nduu táhú núú Yǎ Ndiǒxí sá Espíritú-gá chindee ñàha-xi xii-ndo cada-ndo ná daha núú chiuⁿ, te ío nducu ndèe-ndo cada-ndo chiuⁿ sá ñí nduu táhú-ndó nàcuáa cuita ñíhí ndéé-gǎ ñǎyiu ndècu ichi-gá quǐhíⁿ.

¹³Te núu cǎháⁿ-ndó tnúhu sá ñà túú xiní-ndó, tnúhu sá dǎcàhu iní ñáhá Espíritú Yǎ Ndiǒxí xii-ndo, te xiní ñuhu-xi sá cǎcáⁿ táhú-ndó núú Yǎ Ndiǒxí cuendá sá ná chindee ñaha-gá xii-ndo cǎháⁿ-ndó núú ñǎyiu núu nása quèe-xi tnúhu-áⁿ. ¹⁴Chi núu nchoo na cǎháⁿ ndihi-o Yǎ Ndiǒxí ndihi tnúhu sá ñà túú xiní-ó, te ñi yùhu ñi iní-ó cǎháⁿ ndihi-o-gǎ ñicó-ni sá ñǎ tècú tnùnì-ó nàcuáa ndùu tnúhu cǎháⁿ-ó. ¹⁵Te xǎⁿ núu xiní ñuhu-xi cǎháⁿ ndihi-o Yǎ Ndiǒxí ñi yùhu ñi iní-ó nàcuáa chindee ñaha Espíritú-gá xii-o te cǎháⁿ-ó nàcuáa tecú tnùnì-ó, te ñiú-ni ducaⁿ cǎda-o oré xítá yùhu-o chiñuhu-o Yá Ndiǒxí, chi ñi yùhu ñi iní-ó dùcaⁿ cada-o nàcuáa chindee ñaha Espíritú-gá xii-o, te cùtnuní iní-ó nàcuáa cuáháⁿ nchaa tnúhu cǎháⁿ-ó xità-o. ¹⁶Chi núu nchoo na ndàcáⁿ táhú-ó núú Yǎ Ndiǒxí ndihi mee-ni tnúhu sá ñà túú xiní-ó tnúhu sá dǎcàhu iní ñáhá Espíritú-gá xii-o, te ñǎyiu ñá túú ní ndùu táhú cǎháⁿ tnúhu cǎháⁿ-ó ndèdóho ñàhá-yu xii-o, te ñǎyiu-áⁿ vǎ ndácǔ-yu cǎháⁿ-yu tnúhu cǎháⁿ-ó ndàcáⁿ táhú-ó ndìhí-yu núú Yǎ Ndiǒxí chi ñá túú tècú tnùnì-yu tnúhu cǎháⁿ-ó. ¹⁷Te váha-ni quède-o sá dúcáⁿ cǎháⁿ-ó ndàcáⁿ táhú-ó núú Yǎ Ndiǒxí, te ñicó-ni sá tnúhu-áⁿ ñà túú chindee-xi ñǎyiu nàcuáa cuita ñíhí ndéé-gǎ-yu cundecú-yu ichi-gá. ¹⁸Te yúhú ío ndàcáⁿ táhú-í núú Yǎ Ndiǒxí chi cǎháⁿ-í tnúhu sá ñà túú xiní-í tnúhu sá dǎcàhu iní ñáhá Espíritú-gá xii-í, te cǎháⁿ-gá-í dǎcúxí nchaa nchohó. ¹⁹Te òré tàcá ñǎyiu ndècu ichi Yá Ndiǒxí dǎcuàhá-yu tnúhu-gá, te

càháⁿ-í tnúhu-gá núũ-yu sá sà ní cutnùní iní mée-í nàcuáa ducaⁿ cùtnuní iní-yu nàcuáa ndùu tnúhu càháⁿ-í. Te tnàhá-gá iní-í càháⁿ-í úhúⁿ-ni tnúhu-áⁿ núũ-yu dàcúúxí sã càháⁿ-í úxí mĩl tnúhu sá ñà túú xìní-í, tnúhu sá dácàhu iní ñáhá Espíritú Yã Ndiõxí xii-í càháⁿ-í.

20Te nchòhó ñáyiu ndècu ndìhi-í ichi Xítóhó Jesucrìstú, vá cání iní-ndó dàtná sání iní cue landú, chi cani iní-ndó dàtná tàú-xi cunduu chi sa sacuéhé-ndó. Dico cuu-ndo dàtná cue landú lĩhli vá cùndècu-ndo ichi cuehé ichi duha, chi cue landú-áⁿ ñà túú ndècu-güexi ichi-áⁿ. **21**Te núú tütú Yã Ndiõxí càháⁿ-xi nàcuáa ní càháⁿ-gá, te cächí-xi: “Cue tée ñuú xicá càháⁿ ndi díⁿ núú tnúhu quíhíⁿ-güedé càháⁿ-güedé tnúhu-í núú ñáyiu isràél cada-güedé núu-í, te cuèi ducaⁿ dico vá quèndáá iní-yu tnúhu-í”, duha ní cachí Yã Ndiõxí te ducaⁿ ñi ngúndeé núú tütú-gá. **22**Te tnúhu sá dácàhu iní ñáhá Espíritú Yã Ndiõxí xii-o tnúhu sá ñà túú xìní-ó, xíãⁿ cúú-xí cuèndá sá cùtnuní iní cue ñáyiu ñà túú sàndáá iní tnúhu Yá Ndiõxí sá ñà túú cùu váha iní ñáhá-gã xií-yu. Dico sá cúú-xí cuè ñáyiu sàndáá iní tnúhu-gá ñà túú ñà quidé-xí sã cúú-xí-yu. Te tnúhu sá dácàhu iní ñáhá Yã Ndiõxí xii-o, xíãⁿ cúú-xí cuèndá sá cùtnuní iní cue ñáyiu sàndáá iní tnúhu-gá sá ndécú ndìhi ñaha-gá xií-yu, dico ñà túú dùcaⁿ sani iní cue ñáyiu ñà túú sàndáá iní tnúhu-gá. **23**Te núú ní tacá nchaa nchòhó ñáyiu ndècu ichi Yá Ndiõxí, te nchaa-ndo ñi ngüíta-ndo càháⁿ-ndó tnúhu sá dácàhu iní ñáhá Espíritú Yã Ndiõxí xii-ndo tnúhu sá ñà túú xìní-ndó, te mei òré-áⁿ quexìo cue ñáyiu ñà túú sàndáá iní tnúhu-gá, ndìhi cue ñáyiu vátá quèní dana-gá tnúhu-gá núú ndécú-ndó, te ñáyiu-áⁿ quesàhá-yu sá lúcú-ndó te núu ducaⁿ càháⁿ-ndó tnúhu sá dácàhu iní ñáhá Espíritú-gá xii-ndo òré quexìo-yu. **24**Dico núu nchaa-ndo càháⁿ-ndó tnúhu sá dácàhu iní ñáhá Yã Ndiõxí xii-ndo, te mei òré-áⁿ quexìo cue ñáyiu ducaⁿ ñà túú sàndáá iní-xi tnúhu-gá, ndìhi cue ñáyiu ducaⁿ ñà túú xìní dana tnúhu-gá-áⁿ, te ñáyiu-áⁿ cutnùní iní-yu sá ndécú cuèchi-yu núú-gã, te ngüíta-yu cuáha-yu cuèndá sá ñà túú quide váha-yu ndécú-yu cuèndá sá càháⁿ-ndó tnúhu-gá ndèdóho-yu. **25**Te nchaa sá cuèhé sá dúhá ñi quidé-yu sàni iní-yu yìyuhu ndacu iní-yu, te ngüíta-yu náhmá-yu nchaa sá ñà túú váha ní quidé-yu núú Yã Ndiõxí, te cachí-yu sá ïo càhnu cuu-gá, te cachí tucú-yu sá ndàá ndécú ndìhi-ndo-gá.

Cada-o nàcuáa tàú-xi cunduu

26Te vitna nchòhó ñáyiu ndècu ndìhi-í ichi Xítóhó Jesucrìstú xìnì ñuhu-xi duha cada-ndo. Òré tàcá-ndó te dava-ndo càta yuhu-ndo chiñuhu-ndo Yá Ndiõxí, te dava-ndo dàsahú-ndó ñáyiu tnúhu-gá, te dava-ndo càháⁿ-ndó nàcuáa dàquixi túu Yá Ndiõxí iní-ndó, te dava-ndo càháⁿ-ndó tnúhu sá dácàhu iní ñáhá Espíritú Yã Ndiõxí xii-ndo tnúhu sá ñà túú xìní-ndó, te dava-ndo càháⁿ-ndó nàcuáa quèe-xi tnúhu-áⁿ. Te nchaa sá

quidé-ndó ná cùu-xi nacuáa chindee-xi ñăyiu nàcuáa cuita níhí ndéé-gă-yu cundecú-yu ichi-gá. **27**Te òré cãháⁿ-ndó tnũhu sá dácàhu iní ñáhá Espiritú Yă Ndiõxí xii-ndo tnũhu sá ñà túú xìní-ndó, te úú-ni-ndo àdi úní-ni tnàhá-ndó cãháⁿ-ndó tnũhu-áⁿ te vá úúⁿ ní cãháⁿ-ndó chi ndéé ndihí ìⁿ-ndo te dătnùnì ngüíta ingá-ndó cãháⁿ-ndó. Te xìnì ñuhu-xi sá íⁿ ñăyiu cãháⁿ-yu nàcuáa quèe-xi tnũhu cãháⁿ-ndó-ăⁿ. **28**Te núu ñă túú ñăyiu tècú tnùnì nàcuáa quèe-xi tnũhu cãháⁿ-ndó-ăⁿ, te núú mée nũú íⁿ-ní-ndó cãháⁿ-ndó tnũhu-áⁿ cãháⁿ ndihí-ndo Yă Ndiõxí te vá cãháⁿ-ndó nũú ñăyiu. **29**Te òré cãháⁿ-ndó tnũhu sá dácàhu iní ñáhá Yă Ndiõxí xii-ndo te úú-ni-ndo àdi úní-ni tucu-ndo cãháⁿ, te dava-gá-ndó cùndedóho-ndo tnũhu-áⁿ te cãháⁿ-ndó nũu váha-ni cãháⁿ-güedé àdi ñă túú vâha-ni. **30**Te núu ìⁿ-ndo nĩ dácáhú iní ñáhá Yă Ndiõxí xii-ndo ìⁿ tnũhu cãháⁿ-ndó, te núu ìⁿ-ndo sà caháⁿ-ndó te ngüíñí-ndó te quíhu tucu ingá-ndó cãháⁿ-ndó nàcuáa ní dácáhú iní ñáhá Yă Ndiõxí xii-ndo. **31**Te nchaa nchòhó ñăyiu ní nduu táhú cãháⁿ tnũhu sá dácàhu iní ñáhá Yă Ndiõxí, te vá úúⁿ-ní cãháⁿ-ndó chi díhna-gá ìⁿ-ndo cãháⁿ te dătnùnì cãháⁿ tucu ingá-ndó. Te ducaⁿ càda-ndo cuendá nchaa-ndo tècú tnùnì-ndó nàcuáa ndùu tnũhu cãháⁿ ìⁿ ìⁿ-ndo, te ducaⁿ te cudíí-gă iní-ndó cànchicúⁿ nihnu-ndo ìchi-gá. **32**Te nchaa ñăyiu cãháⁿ tnũhu Yă Ndiõxí sa nàha-ná mée-yu nàcuáa quidé-yu cãháⁿ-yu tnũhu-gá nàcuáa ñă túú quide cutexínu-yu. **33**Te Yă Ndiõxí cúú-gă Yaa quidé ïo váha cùu ìⁿnuu-ndo ndecu-ndo, te ñă túú daticá nuu ñaha-gă xii-ndo.

Te na cãchí tnũhu-í xii-ndo nàcuáa cãháⁿ-í nchaa núú tàcá cue ñăyiu ndècu ndihí-o ichi Xítohó Jesucrìstú. **34**Te yúhú cãchí-í sá vă cúú cãháⁿ cue ñăyiu ðihí òré tàcá-ndó dăcuaha-ndo tnũhu-gá, chi ñă túú dùcaⁿ cuiní-gá cadá-yu, te quíndáá-ni iní-yu cadá-yu nàcuáa tàú-xi cunduu. **35**Te núu ìⁿ sá cuiní-yu nducu tnũhu-yu te ndéé òré nasáá-yu vehé-yu te nducu tnũhu-yu núú yíí-yu, chi ñă túú ndùu váha-xi sá cãháⁿ-yu núú tàcá nchaa ñăyiu dăcuáha ndihí-yu tnũhu-gá.

36Te chí dándàcu iní sá ñà díú nchòhó cúú-ndó ñăyiu ní ngúndecu ndihí tnũhu Yă Ndiõxí díhna nuu nàcuáa datècú tnũhu-ndo dăva-gá ñăyiu, te ni ñà díú mée-ni nchòhó sa ní ngúndecu ndihí-ndo tnũhu Yă Ndiõxí vitna, núu xíăⁿ vá cãchí-ndó sã ïo cùnùu-ndo. **37**Te núu dava nchòhó sání iní-ndó sã cãháⁿ-ndó nàcuáa dăcahu iní ñáhá Yă Ndiõxí xii-ndo àdi sani iní-ndó sã quidé-ndó nàcuáa chindee ñaha Espiritú-gá xii-ndo, te cuáha váha-ndo cuendá sá ncháá tnũhu cãháⁿ-í-a cùu-xi tnũhu sá nĩ cachí tnũhu mee Xítohó Jesucrìstú cada-o. **38**Te nděda-ni càa ñăyiu ndècu ndihí-ndo te núu ñă túú sàndáá iní-yu tnũhu cãháⁿ-í, te vá cadá cuendá-ndó tnũhu cãháⁿ-yu.

39Te vitna nchòhó ñăyiu ndècu ndihí-í ichi Xítohó Jesucrìstú, ío cani iní-ndó cãháⁿ-ndó tnũhu sá dácàhu iní ñáhá Yă Ndiõxí núú ñăyiu, te

daña-ndo na cãháⁿ cue ñáyiu ní nduu táhú nũú Yã Ndiõxí sá cãháⁿ-yu tnúhu sá dácãhu iní ñáhá Espíritú-gá xií-yu tnúhu sá ñà túú xiní-yu. ⁴⁰Te cada-ndo nchàa nacuáa tàú-xi cunduu nãcuáa ñã túú ñã cuu cundecu-ndo.

Ní ndoto Xítoho Jesucrístú

15 ¹Te vitna nchòhó ñáyiu ndècu ndihi-í ichi Xítoho Jesucrístú cuení-í sá dándacu iní-ndó nãcuáa ní dánèhé ñáhà-í xii-ndo tnũhu sá cãháⁿ nãcuáa naníhí tàhú-ó, chi diu tnúhu-áⁿ ní sándáa iní-ndó te nchìcúⁿ nihnu-ndo. ²Te sá xíi tnũhu-áⁿ níhnú-ndó ìchi cuáháⁿ-ndó nũú ndúú tãhú-ndó cundecu-ndo ndihi Yá Ndiõxí ni caa ni quíhíⁿ, te ducaⁿ ndúú táhú-ndó nũú cundecu-ndo ni caa ni quíhíⁿ ndihi Yá Ndiõxí te núu nchìcúⁿ nihnu-ndo nãcuáa ní dánèhé ñáhà-í xii-ndo, te núu ñã túú nchìcúⁿ nihnu-ndo te ñã túú ní sándáa iní-ndó nãcuáa tàú-xi cunduu.

³Te yúhú sa ní cachí tnúhu-í xii-ndo ìⁿ tnúhu sá ïo cùnuu ní níhì-í, chi ní cachí tnúhu-í xii-ndo sã Xítoho Jesucrístú ní xíhí-gá cuendá nchaa yíca cuèchi-o, te ducaⁿ ní cuu chi ducaⁿ cãháⁿ-xi núú tütú Yã Ndiõxí sá dúcáⁿ yãha-gá. ⁴Te ní chindúxi ñaha-güedë xii-gá te nduu úní ní dándótó ñaha Yá Ndiõxí xii-gá, te ducaⁿ ní cuu chi ducaⁿ cãháⁿ-xi núú tütú Yã Ndiõxí. ⁵Te sátá ní ndoto-gá te ní quee túu-gá núú tẽ Pèlú, te dãtnùní ní quee túu-gá núú dãva-gá cue téé ní táuchíúⁿ-gã cáháⁿ tnúhu-gá. ⁶Te sátá dúcáⁿ te dãtnùní ní quee túu-gá núú ùhúⁿ ciendú cue ñáyiu ndècu ichi-gá, te vãi-yu xĩndecu-ní-yu vitna chi sacú-ni-yu ní xíhí. ⁷Te dãtnùní ní quee túu-gá núú tẽ Jãcobó, te sátá dúcáⁿ te dãtnùní ní quee túu-gá núú nchaa cue téé ní táuchíúⁿ-gã cáháⁿ tnúhu-gá.

⁸Te ndéé núú ní ndihi-ná te ní quee túu-gá núú mèè-í, te òré ní quee túu-gá núú-í te cùu-í dàtná ìⁿ déhe yiquíⁿ vãtã sãa-gá nduu càcu chi cùu-í ìⁿ téé ñã túú sàni váha iní-xi cuendá-gá ní cùu. ⁹Te yúhú ñã túú cùnuu-í dàtná cùnùu cue téé ní táuchíúⁿ Xítoho Jesucrístú cáháⁿ tnúhu-gá. Te cùu-í ìⁿ téé ní táuchíúⁿ-gã cãháⁿ tnúhu-gá, cuèi ñã túú tàú-í sá cãháⁿ-í tnúhu-gá, chi ní xóo cuu úhú iní-í cue ñáyiu ndècu ichi Yá Ndiõxí. ¹⁰Dico Yá Ndiõxí ío váha iní-gá chi ní quide ñaha-gã xii-í ìⁿ téé váha, chi ñã túú-gã quídè-í dàtná ní xóo cada-í. Te ío cundahú iní ñáhá-gã chindèe ñaha-gã xii-í dico ñã túú àúⁿ ñã cuu chĩndee ñaha-gã, chi ío-gã vãi chiuⁿ-gá ní cuu sa ta quide-í cuáháⁿ dácúxí dãva-gá cue téé ní táuchíúⁿ-gã cáháⁿ tnúhu-gá te ñã díú mèè-í ducaⁿ quide-í chi mee Yã Ndiõxí ío cundahú iní ñáhá-gã chindèe ñaha-gã xii-í quídè-í chiuⁿ-gã. ¹¹Te ñã túú ñã cada-xi cuèi dava-gã-güedë sa ní cuu vãi-gã chiuⁿ-gã quídè-güedë àdi yúhú, chi ìⁿ-ni tnúhu cãháⁿ-ndí te tnúhu-áⁿ cúú tnũhu ní sándáa iní-ndó.

Cue ñáyiú ní xíhí ndotó-yu

12Te nchúhú cue tée cãháⁿ tnúhu Xítóhó Jesucristú cãháⁿ-ndí sá nǐ xíhí-gá te ní ndoto-gá, ¿te ná cuendá dava nchòhó cãchí-ndó sã vã ndótó cuè ñáyiú ní xíhí? 13Te núu ducaⁿ sàni iní-ndó sã vã ndótó cuè ñáyiú ní xíhí te ni Xítóhó Jesucristú ñá túú ní ndòto-gá te núu ducaⁿ. 14Te núu dìcò Xítóhó Jesucristú ñá túú ní ndòto-gá ñá, te nchaa tnúhu sá dánèhé ñáhá-ndǐ xii-ndo ñà túú nàndíhi-xi te núu ducaⁿ, te àúⁿ nã cuu sàndáá iní-ndó-gã te núu ducaⁿ. 15Te núu dìcò cúú-xí ìⁿ sá ndàá tnúhu sàni iní dava-ndo ña, te dàcuandehnde-ndí sá cãháⁿ-ndí tnúhu Yá Ndiöxí núú-ndó te núu ducaⁿ, te ñá túú cãháⁿ ndáá-ndí núú-ndó sã Yã Ndiöxí ní dándótó-gã Xítóhó Jesucristú, te núu ndáá nàcuáa sàni iní dava-ndo sã vã ndótó cuè ñáyiú ní xíhí, dico ñá ndàá nàcuáa sàni iní-ndó. 16Te núu vã ndótó cuè ñáyiú ní xíhí te ni Xítóhó Jesucristú ñá túú ní ndòto-gá. 17Te núu Xítóhó Jesucristú ñá túú ní ndòto-gá ñá, te àúⁿ nã cuu sàndáá iní-ndó-gã te núu ducaⁿ, te ndècu-ni cuèchi-ndo nǔú Yã Ndiöxí te núu ducaⁿ. 18Te núu ndáá nàcuáa sàni iní-ndó ñá te cue ñáyiú ní sàndáá iní ñáhá xii Xítóhó Jesucristú ñáyiú ní xíhí ní xíta nihnú-yu te núu ducaⁿ. 19Te núu nchoo ndècu ndíhi-o tnúhu ndee ìní núú Xítóhó Jesucristú cuendá-ni sá cùndècu-o ñuyíú-a ña, te cùu-o ñáyiú ío-gá duuⁿ duuⁿ ndàhú sá cúú-xí dàva-gá ñáyiú te núu ducaⁿ.

20Dico ndáá sá Xítóhó Jesucristú ní xíhí-gá te ní ndoto-gá nǔu xíãⁿ cútnùní iní dava-o sã ndótó cuè ñáyiú ní xíhí ñáyiú ní sàndáá iní tnúhu-gá. 21Te sá cuèchi ìⁿdìi-ni tée ní xíndecu ñuyíú-a xíãⁿ xihí ñáyiú, te sá cuendá ìⁿdìi-ni tucu íngá tée te ndoto cue ñáyiú ní xíhí. 22Te nchaa ñáyiú xihí-yu sá cuèchi ìⁿ tée, te tée-áⁿ cúú-dě ndíí Àdán tée díhna nuu nǐ cuu ñaní tnáhá cuè ñáyiú ñuyíú. Te diu-ni ducaⁿ sã cuendá ìⁿdìi-ni tée te ndoto cue ñáyiú ní xíhí, te tée-áⁿ cúú-dě Xítóhó Jesucristú chi nchaa ñáyiú ndècu ndíhi-gá ndotó-yu. 23Te díhna-gá Xítóhó Jesucristú ní ndoto-gá xíãⁿ cútnùní iní dava-o sã ndùu na quixi tucu-gá ñuyíú-a te dàvá-áⁿ ndoto nchaa ñáyiú ní xíhí ñáyiú ní sàndáá iní tnúhu-gá. 24Te dǎtnùní ducaⁿ te sáá nduu nàa nchaa sá ío ñuyíú, te Xítóhó Jesucristú danàa-gá nchaa ndí túhú sá cùnùu ío ñuyíú-a, chi danàa-gá nchaa ñáyiú ío cùnùu, ndíhi yucu ñávãha, ndíhi nchaa espíritú xínú cuèchi núú-xi. Te ducaⁿ te cúñaha-gã xii Tátá-ó Dütú Ndiöxí taxi tnùnigá. 25Chi Xítóhó Jesucristú dacuitíí taxi tnùnigá ndéé ná sàá nduu dànaa-gá nchaa sá cúú ùhú iní ñáhá xii-gá. 26Te ndéé núú nǐ ndíhi-ná te danàa-gá sá quidé xihí ñáyiú. 27Te ducaⁿ chi cãháⁿ-xi núú tütú Yã Ndiöxí sá méé-gã ní nachíhi-gá nchaa sá ío ndaha Xítóhó Jesucristú cuendá sá méé Xítóhó Jesucristú taxi tnùnigá, te vã yõo ìⁿ taxi tnùnigá ñáhá xii Yá Ndiöxí, chi mee Yã Ndiöxí cúú-gã Yaá ní

nachihi-gá nchaa sá ìó ndaha Xítóhó Jesucrìstú. **28**Te díhna-gá ní xáhaⁿ Yă Ndiöxí xii Xítóhó Jesucrìstú Yaá cúú Dêhe-gá sá quíndàha-gá nchaa sá ìó, te òré ná quíndaha Xítóhó Jesucrìstú nchaa sá ìó, te cúñaha-gă xii Yă Ndiöxí taxi tnùnì ñáhá-gă xii-gá, te ducaⁿ te mee-nă Yă Ndiöxí taxi tnùnì-gá nchaandi túhú sá ìó.

29Te núu ñá túú ndăá càháⁿ-í, ÷te ná cuendá dava ñáyiú sànduté-yu cuendá ñáyiú ní xíhí nŭu ñá túú ndăá sá ndótó ñăyiú ní xíhí?

30Te nchúhú ducaⁿ-ni sàni iní ñáyiú cahni ñáhá-yu xii-ndí, te núu vá ndótó ñăyiú ní xíhí te àúⁿ nă cuu ducaⁿ quide cahnu iní-ndí ducaⁿ cuiní-yu cahni ñáhá-yu xii-ndí te núu ducaⁿ. **31**Te nchòhó ñáyiú ndècu ndíhi-í ichi Xítóhó Jesucrìstú ío váha sàni iní-í cuendá-ndó, chi ndècu-o ichi-gá. Te na càchí tnúhu ndáá-í xii-ndo să ìⁿ nduu ìⁿ nduu ndeé iní ñáhá ñăyiú cahni ñáhá-yu xii-í. **32**Te núu dícó ndáá sá vă ndótó ñăyiú ní xíhí dàtná càchí dava ñáyiú, te àúⁿ nă cuu ní xíndecu-í ñúú Éfesú ní cuu úhú iní ñáhá ñăyiú xii-í te núu ducaⁿ, chi ñáyiú-áⁿ nŭ quidé-yu dàtná quidé ìⁿ quiti dééⁿ să cúú-xì-í. Te núu ndáá sá vă ndótó ñăyiú ní xíhí ñá, te váha-gá nŭu cachí-ó dàtná càchí ñáyiú: “Vitna na còho-o te na càxi-o chi tneé ìdá cuú-ó”, duha càchí-yu.

33Te vá dăñá-ndó mēe-ndo dandahú ñáhá ñăyiú ndècu ichi cuehé ichi duha xii-ndo, te ngúita-ndo càni iní-ndó dàtná sání ìní-yu. Chi quèe ndáá-xi nàcuáa càháⁿ tucu dava-gá ñáyiú, chi càchí-yu sá nŭu ñáyiú quide váha na nìhí tnáhă-yu ndíhi ñáyiú ndècu ichi cuehé ichi duha, te ngúita ñáyiú quide váha-áⁿ cadá-yu tnáhá-yu nchaa sá cuèhé sá dúhá dàtná quidé ñăyiú-áⁿ. **34**Te ío váha cuáha-ndo cuendá nàcuáa cundecu-ndo, te vá cadá-gă-ndó dàtná quidé cuè ñáyiú ndècu ichi cuehé ichi duha. Te dava-ndo quide-ndo datná quidé cuè ñáyiú ndècu ichi cuehé ichi duha chi ñá túú sàndáá iní-ndó Yă Ndiöxí. Te duha càháⁿ-í cuendá sá cúcàhaⁿ núú-ndó cuendá nchaa sá ñà túú văha quide-ndo.

Nàcuáa ndoto ñáyiú ní xíhí

35Te cudana dava-ndo ndècu tnúhu-ndo nŭu nása ndoto ñáyiú ní xíhí, te nása cunduu yiqui cùñú-yu òré ndotó-yu. **36**Te nchòhó ñáyiú ducaⁿ càháⁿ cúú-ndó ñăyiú ñá túú tnàhí cùtnuní iní-xi, te duha na càháⁿ-í nàcuáa tecú tnùnì-ndó. Te núu ìⁿ tatá ná chíhí-ó te tēhyú mēé-xí te xínu déhe-xi.

37Dico ñá díú să sà ní xínu ta sàhnu cuáháⁿ ní cŭxi-o, te diu-ni ducaⁿ quide-o cuéi tríú ndíhi nchaa dava-gá tatá xítú-ó. **38**Te Yă Ndiöxí quidé-gă sácŭnduu tatá xínu-áⁿ dàtná cuiní mēé-gă cunduu. Te ndēda-ni càa tatá te diu-ni-gá quidé-gă sácŭnduu-xi nàcuáa tàú-xi cunduu. **39**Te ndi díⁿ ndăa nchaa yiqui cùñú, chi tucu càa yiqui cuñú nchoo cuè ñáyiú, te tucu càa yiqui cuñú nchaa quiti xìca núú ñúhú, te tucu càa yiqui cuñú nchaa quiti

ndàva, te tucu càa yiqui cuñú nchaa chácá. ⁴⁰Te ducaⁿ ñà túú ìⁿ-ni caa nchaa yiqui cuñú sá ìó andiu ndìhi nchaa yiqui cuñú ñáyiú ìó ñuyíú-a, te ducaⁿ ñà túú ìⁿ-ni ndáa vii nchaa sá ìó andiu ndìhi ñuyíú-a. ⁴¹Te ducaⁿ cùu tucu-xi nchíanchii chi tucu dàyehé-xi, te tucu dàyehé yóó, te tucu dàyehé nchaa chódíní, te ducaⁿ ñà túú ìⁿ-ni dayehé nchaa chódíní. ⁴²Te ducaⁿ sãtnahá-xi cùu ñáyiú ní xíhí te ndoto, chi tucu càa yiqui cuñú-yu sá nguñdũxi te tucu cunduu yiqui cùñú-yu òré ndotó-yu, te yiqui cùñú sá ndótó ndìhí-yu-áⁿ vã ndíhí ñihnu-gá-xi. ⁴³Te yiqui cùñú ñáyiú xihí ñá túú nàndíhi-xi, dico yiqui cùñú sá ndótó ndìhí-yu te ío váha cunduu. Te nchaa yiqui cùñú ñáyiú xihí ñá túú tnàhí-gá ndee-xi, dico yiqui cùñú ndoto ndìhí-yu xíãⁿ ío cunduu ndee-xi. ⁴⁴Te yiqui cùñú nchaa ñáyiú xihí cúú-xí cuendá ñuyíú-a, dico yiqui cùñú sá ndótó ndìhí-yu xíãⁿ cundecu-ná-xi cuendá Espíritú Yã Ndiõxí. Te dàtná ìó yiqui cùñú sá cúú-xí cuendá ñuyíú-a, te ducaⁿ ìó yiqui cùñú sá cúú-xí cuendá mee-nã Espíritú Yã Ndiõxí.

⁴⁵Te núú tütú Yã Ndiõxí càchí-xi: “Ndíi Àdán ndíi ní xíndecu ndéé díhna ní chihi Yá Ndiõxí íní ndíi”, duha càchí-xi núú tütú-gá. Te íngá tucu téé cùu-dé dàtná ndíi Àdán te téé-áⁿ cúú-dě Xítóhó Jesucristú, te Yaá-áⁿ quídé-gã sá mée-ná Espíritú Yã Ndiõxí quídé-xí ndècu-o ichi-gá vitna. ⁴⁶Te díhna-gá yiqui cùñú cuendá ñuyíú-a ní ngúndecu, te dàtnùní ngúndecu yiqui cùñú cundecu ndìhi mee-nã Espíritú Yã Ndiõxí. ⁴⁷Te téé díhna nuu ñí xíndecu ñuyíú-a chi ñuhu ní cadúha ñaha Yã Ndiõxí xii-dé, te téé-áⁿ cúú-dě ndíi Àdán, te íngá tucu téé ní cuuⁿ-dé andiu te téé-áⁿ cúú-dě Xítóhó Jesucristú. ⁴⁸Te nchaa ñáyiú càa yiqui cuñú-yu dàtná cáá yiqui cuñú té Àdán téé ducaⁿ ñí cuáha ñuhu-áⁿ, te nchaa ñáyiú ní nduu táhú cundecu ndìhi téé ducaⁿ vëxi cuuⁿ andiu-áⁿ, ñáyiú-áⁿ nduu yiqui cùñú-yu dàtná cáá yiqui cuñú ní nduu táhú-dě ndécú ndìhi-dé vitna, te téé-áⁿ cúú-dě Xítóhó Jesucristú. ⁴⁹Te nchaa ñáyiú ñuyíú-a càá-yu dàtná-ni càa datná-ni ndùu téé ducaⁿ ñí cuáha ñuhu-áⁿ. Te nchaa nchoo ñáyiú ní nduu táhú cundecu ndìhi téé ducaⁿ vëxi cuuⁿ andiu-áⁿ nduu-o dàtná-ni càa datná-ni ndùu téé-áⁿ tucu.

⁵⁰Te nchòhó ñáyiú ndècu ndìhi-í ichi Xítóhó Jesucristú càchí tnúhu-í xii-ndo sã ncháá nàcuáa càa yiqui cuñú ñáyiú xíndecu vitna vá sàá-xi cundecu-xi núú ndécú Yã Ndiõxí táxí tnùní-gá, chi ñuyíú-a ndìhi ñihnu-xi. Dico sá tàú-xi sáá núú ndécú-gã táxí tnùní-gá xini ñuhu-xi cuu-xi sá cùdii cundecu. ⁵¹Te na càchí tnúhu-í xii-ndo ìⁿ tnúhu sá yíyùhu ni cuu: Dava-o cùú-ó te dava-o cùndecu-ni-o, dico nchaa-o nàdáma yiqui cuñú-ó. ⁵²Te uuⁿni ducaⁿ nàdáma yiqui cuñú-ó òré cáháⁿ ìⁿ cútú, te cútú-ãⁿ cãháⁿ-xi òré sa ta cùyatni naa ñuyíú. Te òré cáháⁿ cútú-ãⁿ te ndoto nchaa ñáyiú ní xíhí ñáyiú ní xíndecu ichi Xítóhó Jesucristú, te ducaⁿ te vá íⁿ ndùu ìⁿ quíú-gã

cuú-yu. Te nchaa ñáyi ndècu vívú te nàdáma yiqui cuñú-yu tnàhá-yu. ⁵³Te nchaa yiqui cuñú ndécú ndìhi nchaa ñáyi ndècu ñuyíú-a vitna ñá túú cùdí-xi chi xihí-xi, dico yiqui cuñú nduu táhú nchoo ñáyi ndècu ichi Xítohó Jesucrístú chi cudí-xi ni caa ni quíhíⁿ chi vá cùú-gá-xi. ⁵⁴Te òré ná ndùu táhú-ó yiqui cuñú sá dúcáⁿ cùdí ni caa ni quíhíⁿ-áⁿ, te vá cùndècu ndìhi-gá-ó yiqui cuñú sá ñá túú cùdí. Te dàvá-áⁿ te quee ndáá-xi nàcuáa càháⁿ-xi núú tütú Yá Ndiöxí núú càchí-xi: “Vitna ñá túú-gá xihí ñáyi chi mee-ná Yá Ndiöxí cùnù-gá táxi tnùnì ñáhá-gá xií-yu. ⁵⁵Te ñá túú tnàhí-gá ná ndoho ñáyi sá cuèndá tnúhu xihí, chi vá cóó-gá tnúhu xihí”, duha càchí-xi núú tütú Yá Ndiöxí. ⁵⁶Te cue ñáyi ndècu ndìhí-yu tnúhu sá sánú ìchi ñaha xií-yu nàcuáa cada-yu cundecú-yu dico uuⁿ-gá quídè-yu nchaa sá cuèhé sá dúhá. Te sá cuèndá nchaa sá cuèhé sá dúhá quídè-yu-áⁿ, te xíáⁿ ní ngúndecu tnúhu xihí dándòho ñaha-xi xií-yu. ⁵⁷Dico táxáhu xii Yá Ndiöxí chi ní taxi-gá tnúhu ndee ìní ndécú ndìhi-o sá sàá nduu te vá quíní-gá-ó tnúhu xihí, te ducaⁿ chi ndècu ndìhi-o Xítohó Jesucrístú.

⁵⁸Te xíáⁿ nùu càháⁿ-í dóho nchòhó cue ñáyi ndècu ndìhi-í ichi Xítohó Jesucrístú chi ío cùu ìní ñáhà-í xii-ndo, te càháⁿ-í dóho-ndo sá cànchícúⁿ nihnu-ni-ndo ìchi Xítohó Jesucrístú cuèi nándi na càda ñaha ñáyi xii-ndo sá cuèndá-gá, te ío nducu ndèe-ni-ndo cada-ndo chiuⁿ-gá, chi sa nàha-ndo sá ncháá chiuⁿ quide-o cuèndá-gá ñá túú àúⁿ nă cuu quide-o.

Nàcuáa sàcáⁿ tnáhá ñáyi díhúⁿ

16 ¹Te na càchí tnúhu-í xii-ndo cuèndá díhúⁿ sá sàcáⁿ tnáhá-ndó sá cúú-xí ñáyi ñuú Jerusàlén, chi diu-ni duha ní dánèhé-í cue ñáyi xíndecu ichi Xítohó Jesucrístú ndécú ìⁿ ìⁿ xichi distritú Gàlaciá. ²Te duha cada-ndo ndì tnahá nduu ndumìngú, te ìⁿ ìⁿ-ndo dàquee diiⁿ-ndo sacú díhúⁿ nàcuáa chindee ñaha Yá Ndiöxí xii-ndo nihí-ndó cuèndá òré quexìo-í te sa cundecu túha díhúⁿ-áⁿ. ³Te òré quexìo-í te mee-ndo cãxi-ndö-yu núu ndèdacàa-yu sàni ìní-ndó càda ndáá canehe díhúⁿ-áⁿ quíhíⁿ ndaha ñáyi xíndecu ichi Xítohó Jesucrístú ndécú ñuú Jerusàlén. Te cadúha-í ìⁿ úú tutú canehé-yu quíhíⁿ cuèndá cutnùnì ìní ñáyi ñuú Jerusàlén nàcuáa ndùu chiuⁿ cuáháⁿ-yu. ⁴Te núu xini ñuhu-xi sá quíhíⁿ-í te candeca-í-yu quíhíⁿ.

Té Păblú sání ìní-dé quíngoto-dé cue ñáyi ndècu ichi Xítohó Jesucrístú

⁵Te yúhú sání ìní-í yáha-í ìⁿ úú ñuú cáá distritú Macèdoniá, te dàtnùnì ducaⁿ te sáá-í núu ndécú-ndó. ⁶Te òré quexìo-í te cudana cundecu ndìhi ñaha-í xii-ndo vài nduu, àdi cudana te cundecu ndìhi ñaha-í xii-ndo ndèé yáha nchaa yóo quídè víxiⁿ-xi. Te sáta dúcáⁿ te cada ndee ìní-ndó chindee ñaha-ndo xii-í òré nucúhuⁿ ichi-í te núu ndèé ichi na quíhíⁿ-í. ⁷Te duha càháⁿ-í chi núu Yá Ndiöxí ná càchí-gá te cundecu ndìhi ñaha tnàa-í xii-ndo

òré quexìo-í te ñá dífú dícó-ni ichi yãha-í. **8**Te cundecu-ni-í ñuú Éfesú-a ndéé tnahá vico Pentecòstés. **9**Te ducaⁿ chi iha ío tédóho ñáyiú tnúhu Xítóhó Jesucristú sá cãháⁿ-í núũ-yu. Núu xĩáⁿ ío váha quèe cuendá cada-í chiuⁿ-gá cuèi ío vai ñáyiú ñá túú tnàhá iní-yu sá cãháⁿ-í tnúhu-gá.

10Te núu na quixi coto ñaha té Timùteú xii-ndo, te ío váha cuu iní-ndó cãháⁿ ndihi-ndo-dě cuendá ducaⁿ ñà túú ñà cani iní-dé cundecu ndihi ñaha-dě xii-ndo, chi tnàhá-dé cúú-dě tée quide chiuⁿ Xítóhó Jesucristú dàtná quidè-í. **11**Te cuiní-í sá ñi ìⁿ-ndo vá cáni cuèhé iní-ndó cuendá-dé, te chindee-ndo-dě ñacuáa cuu váha iní-dé òré quixi-dé quixi coto ñaha-dě xii-í, chi yúhú ndihi dava-gá ñáyiú ndècu ichi Xítóhó Jesucristú ndétú-ndĩ-dé quexìo-dé.

12Te ío ní cãháⁿ ndàhú-í núú tẽ Àpolós tée ndècu ndihi-o ichi Xítóhó Jesucristú cuendá quixi-dé ndihi dava-gá cue tée ndècu ndihi-o ichi-gá quixi coto ñaha-güedě xii-ndo dico ñá túú ní cuiní-dé quixi-dé vitna, dico quixi-dé ndéé cuèé-gá.

Tnúhu ndéé núú ñi ndihi-ná

13Te ío quihí iní-ndó cundecu-ndo ichi Xítóhó Jesucristú, te vá dáñá ndéé-ndó quèndáá iní-ndó-gã, te ío yii cunduú iní-ndó cundecu-ndo ichi-gá, te ío nducu ndèe-ndo canchicúⁿ nihnu-ndo ìchi-gá. **14**Te ío váha cuu iní tnàhá-ndó, te ducaⁿ ìo váha cada tnàha-ndo te núu nándi cùu sá vãha sàni iní-ndó càda-ndo.

15Te nchòhó ñáyiú ndècu ndihi-í ichi Xítóhó Jesucristú sa ñaha-ndo sá dñhnanuu cuè ñáyiú cùu ndi mee té Èstéfanás ndécú dìstritú Acãyá ní sándáá iní-yu tnúhu Xítóhó Jesucristú. Te vitna ñá túú dàña ndeé-yu quidè-yu sá vãha sá cúú-xí dàva-gá ñáyiú sándáá iní tnúhu-gá. **16**Te cãháⁿ ndàhú-í núú-ndó sã quèndáá iní-ndó nchàa ñáyiú ducaⁿ xĩquide, ndihi nchaa dava-gá ñáyiú ío ndècu ndee quide chiuⁿ ndihi-ndo cuendá Xítóhó Jesucristú. **17**Te ío cùdíí iní-í sá ñi quexìo té Èstéfanás, ndihi té Fortunatú, ndihi té Acàicú, chi cue tée-áⁿ ñi quide-güedé núú-ndó ñi quide-güedé nchaa sá ñà túú ndàcu-ndo cada-ndo cuendá-í ní cùu. **18**Te ío tàxi-güedé tnúhu ndee ìní xii-í, te diu-ni ducaⁿ tàxi-güedé tnúhu ndee ìní xii nchòhó tucu, te núu xĩáⁿ xíní ñùhu-xi sá cánèhe-ndo sá yĩñùhu núú nchàa cue tée duha xĩquide váha.

19Te nchaa ñáyiú xĩndecu ichi Xítóhó Jesucristú ndécú dìstritú Àsiá quide ndee iní ñáhã-yu xii-ndo, te ío cada ndee ìní-ndó càchí té Àquilú ndihi ñadìhí-dé tá Priscilá, te ducaⁿ quide ndee iní ñáhá tucu nchaa ñáyiú tàcá dácuaaha tnúhu Yá Ndiõxí vehé-yu xii nchaa nchòhó ñáyiú ndècu ichi-gá. **20**Te cada ndee ìní tucu-ndo càchí cue dava-gá ñáyiú ndècu

1 CORINTIOS 16

ndihi-o ichi Xítoho Jesucristú. Te ni yùhu ni iní-ndó càda ndee iní tnahá-ndó ìⁿ ìⁿ-ndo.

21Te vitna ndaha mee yùhú té Păblú tée-í tnúhu-a quide ndee iní ñáhà-í xii-ndo.

22Te ñáyu ñá túú cùu váha iní-xi núú Xítoho Jesucristú te na cuíta nihnú-yu. Te vitna nchaa-o chí ná càchí-ó sã Xítoho Jesucristú quixi tucu-gá.

23Te xicáⁿ táhù-í núú Xítoho Jesucristú sá ná chindee chitúu ñaha-gã xii-ndo. **24**Te ío cùu iní ñáhà-í xii-ndo nàcuáa ndècu-o ichi Xítoho Jesucristú, te ducaⁿ na cùnduu, te ío chí cádá ndèe iní-ñã vitna.